

E-EANG LE BOELLE

BARUTUOA BA KA

 Ke monyetla, ruri, ho tla tlung ea Molimo hoseng hona, le ho khumamela Morena oa rona, Kreste ea tsohileng. Oh, e ne e le... Ke sa tsoa kena, nakoana e fetileng. Re bile le kopano e khabane ea boromuoa maobane bosiu, seboka, ho ile ha reroa ho ella koana khitla ea bosiu. Le ho tsoha hoseng hona ho khumamela Morena oa rona Jesu Kreste. Kamoo ho babatsehang ho phutheha 'moho, ho kopana!

² Joale ka ha Moena Thom a ne a bua, kajeno ke letsatsi leo A kholisitseng seo A ne a le sona. Mang le mang o na ka shoa, empa ho nkile Molimo ho tsoha hape. Bophelong ba Hae, O ne a ts'oana le Molimo, A rera joale ka Molimo, A folisa joale ka Molimo, a its'oere joale ka Molimo. E ne e le Molimo. Mme A paka ka Pasika hoseng hore E ne e le Molimo. E le ea fetisang monna. E ne e se moporofeta, empa E ne e le Moporofeta. E ne e le monna ea lokileng, empa A fetisa monna ea lokileng. E ne e le Molimo. 'Me ka hona lena ke letsatsi, la sehopotso sa tsoho ea Hae, ke hore O pakile hona.

³ Re lokela ho nka leeto hoseng hona, le ho theoha le Noka ea Ganges, le tla fumana bomme ba nyehelang lilakabane, likoena masea a bona, ho a lahlela ka hare. Le bua ka bots'epehi? Ba nka liporopotloana tsa bona ba li lahelle likoena ho ba phets'elaka. Ke bots'epehi bo shoetseng boo.

⁴ Ha re ka haola le India, kajeno, le tla fumana, pela literata, mohlomong batho ba bangata ba robetse holima metsu ea lithupa, ba tsamaea hara mollo, 'me ba itlhokofatsa ka tsela e ikhethang. Ba bang ba bona, ehlile, ba mpa ba soasoa feela, hoba e le bakeng sa bahahlauli. Empa mots'eo koana naheng motho oa makhonthe o robetse mono, a itlhokofatsa, a hopola a ka iphumanelia phomolo le khotso, ho rapela—ho rapela Mohammed.

⁵ Pono e haulang, ka tsatsi le leng, ho nyoloha Golgotha, ho kena motseng oa...ka ntle ho motse oa Jerusalema, ke rialo. Hona mabaleng a thakhiso hantle sets'eng sa lebitla la Mohammed, mosali o ne a robetse tlasa qubu ea mahola a bokeletsoeng mono, a ts'oere sengoathoana sa khale sa bohobe bo bots'o. E sa le a robala matsatsi-tsatsi mono, a llela moea oa moratuoa oa hae ea hlokahetseng; hantle lits'eng tseo sefapano se ne se hlomiloe teng. 'Me, ka hona, ho bona lefats'e le kene maemong a bohetene bo bokana!

⁶ Ke ne ke qoqa le Moena Gadus, hase khale haholo, a sa tsoa khutla China. A re, "Moena Branham, ho n'o haula ho bona, koana China." Ho re, "Ba bang ba bona mohlomong esale ba phahamisa matsoho a bona lilemo tse 'ne, ka nako, ho fihlela manala a tabola matsoho a bona, a hlahelle ka morao. Ho thoe, 'Nke ke ka tlosa letsoho la ka pele u mpha khotso moeeng oa ka, uena Buddha e moholo."

⁷ Le-le bana ba bangata ba banyenyane, ha ba sa le bacha, ba roba maoto a bona a kobehe, *joana*; 'me ba roale seeta sa nomoro ea bobeli kapa ea boraro, bophelo bohle ba bona; maotoana a makhuts'oane, kahobane ba etsatsa molimo o ikhethileng oa bohetene sehlabelo.

⁸ Ke etetse boholo ba mabitla a bathei ba borapeli; Mohammed, hape le ho-ho etela lebitla la Buddha, le Confucius, le bafilosofe ba bangata.

⁹ Empa, kajeno, holima tseo tsohle, rona batho ba Bakreste re ka lahlela lihlooho tsa rona morao 'me ra bina, "O a phela, O a phela, Kreste Jesu o a phela kajeno. U re ke tseba joang O a phela; O phela pelong ea ka." 'Me kajeno re fumana lebitla le feela.

¹⁰ E ka ba lilemo tse peli tse fetileng ha ke ea lebitleng, ka meso hoseng ho hong, ho beha palesa lebitleng la 'm'a moshanyana oa ka, ea hlokahetseng, le khaitselinyana ea hae e robetseng letsohong la 'me oa lona, ka ntle mona sets'eng sa Walnut Ridge Cemetery. 'Me eitse ha ke feta, thaka leo la hloephetsa, habeli kapa hararo, le lla, ke nkile nkho ea lipalesa. Ra khumama mono, ra rola likatiba tsa rona; ra li Bea lebitleng, pela lebitla. 'Me ka phahamisa letsoho la ka, 'me ka mo kopela ka matsoho a ka.

¹¹ Ka re, "Billy, 'me oa hao le khaitselinyana ke bao. Mebele ea bona e robetse ka tlase mona. Meea ea bona, e ka pela Sefahleho sa Molimo. Empa mose koana ho leoatle, koana, ho na le lebitla le feela kajeno, ke sehopotso sa Bakreste bohle. O a phela." O a phela. Ke thuto ea motheo ea—ea tumelo ea rona Bakreste, hore Jesu Kreste o a phela kajeno.

¹² Joale, joale ka ha ho n'o ngoliloe pampiring... Joale, ka tloaelo, lits'ebeletsong tsa rona tsa Paseka ha letsatsi le chaba, ka tloaelo re bina e—e thoko, kapa tse peli, le ho beela nako e ngata mona tabernakeleng... Ha re na le baeti mona, che, boholo ba nako ea rona mona ke holima Lentsoe. Re batho ba baholo ba lumelang Lentsoe la Molimo. 'Me ebile ho latela motheo, kea kholoa, ke oona mocha le sona sebaka se lokileng. 'Me kajeno ke na le tse ling—tse ling tsa lintho tse hlokolosi tseo ke batlang ho li bua, ka tsobo, tse ling e le lithuto tsa motheo. 'Me ke batla ho ngoapa lintho tse 'maloa, le 'na, ha ke tsoelapele joalo.

¹³ Pele, ha re phetleng Lengolong mona, ho Mattheu khaolo ea 24, kapa khaolo ea 22, ke rialo, 'me re qala ka temana ea 41. Ke batla ho bala mohlolithero oa Lengolo, ho ntoo kenoa tsohong. Mokotaba oa ka oa ts'ebeletso hoseng hona, o robetse mona.

“Eare ha Baifarasi ba phuthehile ‘moho . . .’” Nts’oareleng. Ke—ke phethile sebaka se phoso, palong ea ka ea mohlolilhero. E ne e le—e ne e le Mattheu oa—oa khaolo ea 23, kea kholoa . . . Motsotso feela. Ke masoabi, ho re, ke fihlile bosiu haholo maobane ‘me ha kea lokisa mohlolilhero oa ka hantle, hoseng hona, moo ho fumanoang palo ea Lengolo la ka. Oh, ee.

*...e-eang le boelle mororutoa oa ka hore ke tla
kopana le bona koana Galelea, . . .*

¹⁴ Ke hantle, monghali. Joale, Jesu Kreste, Mora oa Molimo o neile basali bao ba batho thomo mona, ka mora tsoho ea Hae, hore O tla . . . seo A tla se etsa. A batla ho ba bolella ha A tla kopana le bona Galelea, moo A ba ts’episitseng hore—hore O tla—O tla Iponts’ a bona, le hore O tla ba le bona kamehla.

¹⁵ Joale khaolong ea 28 ea Mattheu, ke rialo, le ho qala ka temana ea 7, re a bala.

*Le mpe le phakise, le ee ho bolella barutuoa ba hae
hore o tsohile bafung; ‘me, bonang, o ea le etella pele
ho ea Galelea; le tla ‘mona teng: bonang, ke le
boleletse.*

¹⁶ E ne e le molaetsa oa Lengeloi ho basali, ho Maria le . . . bo Maria ba babeli. E ne e le ka . . . hoseng ha Paseka ea pele; litaba tse tlotlehang li ne li tumisitsoe.

¹⁷ Mohla A na a phela lefats’eng mona, O tsamaile joale ka Monna, A shebeha joale ka Monna. Ho Eena a na le tsohle—chebeho ea Hae e ka ntle e ne e le Monna; empa, ka hare, O ne a fetisa batho. E ne e le Emmanuel. Kajeno ke sehopotsa sa ketsahalo e kholohali e kileng ea etsahala lefats’eng lohle. Ha ho eso be le monna, ka ntle ho Monna enoa, Kreste Jesu, Ea itseng, “Ke na le matla ho tlosa bophelo ba Ka, ‘me Ke na le matla a ho bo tsosa hape.”

¹⁸ Confuciuse, ee, le Mohammed, le Buddha, ba bang ba bangata, e bile bafilosofe ba baholo; empa, eitse ha ba shoa, eaba ho felile. Eaba ba felile kamehla. Ba ba pata, ‘me hoo . . . ha qeta tsohle.

¹⁹ Empa Monna enoa o na ena le matla a ho nka bophelo ba Hae le ho boela a bo tsosa. Eena feela Motho ea n’ a ka ho etsa; Eena feela ea n’ a ena le hona, ea kileng a kholisa A ka etsa hoo.

²⁰ ‘Me, joale, e sa le e le ts’abo ea motho, ho theoha le mengoaha, e ne e le lefu. Motho mang le mang ea fihlang lefats’eng e sa le a ts’aba lefu. Ba baholo . . . Re bile le boNapoleone, re bile le boHitlelara, le ntho ka ’ngoe; empa ha ho fihloa horeng ea lefu, e mong le e mong oa bona o a honyela. Ke utloile batho ba bua ba bile ba iphafa ka linthohali tse nyefolang; empa, e re ha lefu le fihla, bao, e mong le e mong, a honyelle morao.

²¹ Joale ka Bob Ingersoll, mohetene e moholo ea hloailoeng, mohla a nts'ang ts'upanako ea hae a e bonts'a ba habo, le ho re, "Ha Molimo a le teng, ke tla shoa ka motsotso, ho latela ho otla ha ts'upanako ena." Eitse, hobane ho fete motsotso, a se ke a shoa. A ts'eha haholo ka "ha-ha," le lentsoe, a ba a re, "Le a bona, ha ho ntho e kang Molimo." Empa eitse ha . . .

²² Ehlide, e mpa e le ho phetha Lengolo. Lengolo le itsalo, ho re, "Basomi ba tla hlaha matsatsing a qetelo," 'me rea ba fumana.

²³ Ka hona a re, "Joale, le a bona, ha ho ntho e kang Molimo." Empa ka phaposing ea kokelo mohla a shoang, moo bongata bo ne bo bokane ho bona se tla etsahala, a hoeletsa, "Oho Molimo, hauhela moea oa ka!"

²⁴ Ntate e ne e le motsoalle e moholo oa . . . kapa, e seng motsoalle ea haufi, ke rialo, le mohetene ea hloailoeng. 'Me a re, "Ha ho ntho e kang Molimo." A rohaka eona mehopolo ea Molimo. Mosali oa hae a qhanehe kariki 'me a ee kerekeng, 'me eena a tsoe ho ea lema koro ea hae ka Sontaha, le lintho tsohle, e le ho bonts'a ho se ntho e joalo ka Molimo.

²⁵ Ka tsatsi le leng, a sa tsoa emisa koro ea hae, 'me a e tlammé mangata; lehalima la e otla, la e chesa. A tsoa mono 'me a phahamisa letsoho la hae 'me a rohaka eona mehopolo ea Molimo. 'Me, eitse ha a etsa joalo, eaba lehalima le otla moliko oa hae moo a na hlahletse lipere tse boreleli tsa mojaho, la li bolaea, e 'ngoe le e 'ngoe.

²⁶ 'Me liveke tse 'maloa ka mora moo, a lula a ts'oeroe ke feber ea mala, 'me a shoa, nakong eo ntate a thusitse ho mo keobetella moalong. 'Me a hoeletsa a bile a lla, matemona, a thatetsoeng ka mahlaahlela, a tla a mo setse morao, le nthoo tsohle. 'Me ha a se a khaoha, a bitsa phutha lapa la hae, bana ba hae. A re, "Se eeng ka tsela ea ntata lona. E-eng ka tsela ea 'm'a lona, hoba e le eona feela tsela ea Bophelo."

²⁷ Ke na le buaka hae, e paka ka banna ba bangata ba tsoileng ka mahetla, joale ka ea phahameng . . . e mong oa mafumahali a maholo a—a Engelane, le banna ba bang. Mohla ba ne ba kena lefung, ba hoeletsa 'me ba lla.

²⁸ Mofumahali Elizabeth, oa Engelane, a re, "Ha nka fumana feela . . . Nka nehela ka 'muso oa ka ha nka fumana metsotso e mehlano ea bophelo, ke tle ke etse pakoa ka, le ho lokisa pelo ea ka ho Molimo."

²⁹ Monna e mong ea tumileng, a re, "Ke kena ka ntile lefifing. Ha ke tsebe moo ke eang. Nka . . ."

³⁰ 'Me mohetene e mong e moholo o buile, le ho re, "Eka ho na le le marako a mabeli, 'me ke hoeelitse, 'me," a re, "ho na le molumo o khutlelanang feela ho tloha lerakong ho ea lerakong le leng." E le phetho seo a khonnengho se utloa. A ile a chechisa letsatsi la pholohlo ho fihlela nako e feta.

³¹ Ke ntoo hopola banna ba baholo, ba hloailoeng ba shoeleng, ba lumela Morena oa rona Jesu Kreste le tsoho ea Hae. Ke hopola, mona, ka—ka D.L. Moody, lefung la hae, bongata bo boletse. “Khele, ke lefu lee?” A re, “Lena ke letsatsi la kapeso ea ka.” ’Me ka nahana, mohla—mohla John Wesley, ha a ne a shoa. Mohla Abraham Lincholn a thunngoang ’me a lutla mali ho isa lefung, a robetse e—e tulong.

³² Ka feta mosieme, homme koana Illinois mona, nakoana e fetileng. Ka bona monna ea holileng oa bammala a ena le thaponyana ea moriri o mosoeu e ithatikang le hlooho ea hae, a ntse a itsamaela, a sheba. Ka mora nakona a ema, ’me likelei tsa theoha marameng a hae. A checha ’me a qalella ho rapela. Ka mo lebella metsotso e ’maloa. Ke ntse ke itsamaela, le ’na, ka hona ka atamela ’me ka re, “Malome, molato ke’ng? Ke u bona u rapela.”

A re, “Sheba, ho robetse’ng mono.”

³³ Che, ka sheba ntho e robetseng mono, ’me sohle seo ke se boneng e le mose. ’Me a re . . . Ka re, “Sohle seo ke se bonang ke mose.”

³⁴ “Empa,” ho re, “sheba, monghali.” A re, “Tlasa jase ea ka ho na le motopa oa leqhaama la bokhoba.” A re, “Le hona ana ke mali a Abraham Lincholn.” A re, “Ho qositse mali a Abraham Lincholn ho ntlamolla leqhaama leo la bokhoba.”

³⁵ Ka nahana, “Efela ha monna oa bammala a sisimosoa, ke hobane mali a Abraham Lincholn, hoba a mo tlamolotse leqhaama la bokhoba; Mali a Jesu Kreste a bua le molumeli hakakang, ha re hetla Kalvari le ho bona hobane O tlamolotse leqhaama la bokhoba ba sebe lipelong tsa rona, le ho re lokolla,” seo re buileng ka sona, masiung a ’maloa a fetileng. Ke phapang E kakang!

³⁶ Abraham Lincholn, mohla a na shoa, o na ena le sepheo. ’Me eare ha a . . . empa mohla a na thunngoa mono, ka katheraleng e kholo ena, ’me a shoa moalong oa hae, o itse, “Sokollelang sefahleho sa ka nqa bolikela letsatsi.” Letsatsi le ne le likela mantsiboea. Lincholn o ne a phefumoloha, ’me mali a khakhatsa mats’oafong a hae. E sa le a its’episitse Molimo. A re, “Phahamisang matsoho a ka.” ’Me motho a phahamisa letsoho la hae. A re, “Ntata rona Ea Maholimong, Lebitso la Hao le khethehe,” nakong eo a kebisang hlooho ea hae le ho nehela moea.

³⁷ Paul Radar, motsoalle oa ka e moholo, eena ea ngotseng pina ea ka ea sehlooho, *Lumela Feela*; mohla a na a shoa koana, o na its’etlehile lehetleng la hae, hlooho e beiloe lehetleng la manejara oa ka, Mong. Baxter. E ne e le monnahali ea sebete ea haotseng maoatle le mose ho maoatle, le ntho tsohle, ’me a ile a ferekana holimo koana, ’me a ferekana le batho ba bang ba thutamotheo, ’me molaetsa oa hae oa mo

ts'oentya ho isa lefung. 'Me ha a na shoa, o na robetse ka phaposing, a le makhatheng a lefu, a phehella haufi.

³⁸ 'Me tlholo ea 'nete ea motho ke ena. Kamehla e ne e le motho ea bohale, Paul, joalo ka ha bongata bo mo tseba. Ba tlisa khotete e tsoang Moody Bible Institute tlase mono. 'Me ba theotse masira oohle, lifesetereng, ha a ikela. A phahama, a sheba. A sisinya hlooho ea hae, 'me a re, "Ho shoa mang, 'na kapa lona?" Ho re, "Phahamisang masira ao, 'me le mpinele lipina tse monate, tse mahlahahlaha, tsa tsobo, tsa Evangelii."

³⁹ 'Me eitse ha ba qalella ho bina, a re, "Luke, moena' ka o kae?"

⁴⁰ Moena'e a tlisoa. Luke a tsamaea le eena joalo ka 'na le moshanyana oa ka, le joalo. Luke a le phaposing e latelang, a lla. Luke a kena; monnahali ea mahetla a batsi, mohlomong le a mo tseba. Eena le 'Me Sunday, le bao bohle, ba le teng mono.

⁴¹ Eitse ha a phethoha, a ts'oara Luke ka letsoho, ho re, "Luke, 'na le uena re tsoa hole. Empa, nahana feela, metsotsong e mehlano ho tloha joale, ke tla be ke eme pela Sefahleho sa Jesu Kreste, ke apere ho loka ha Hae."

Maphelo a banna ba baholo a re hopotsa
Hore re ka phethisisa maphelo a rona,
Ka likarohano, ra siea
Mehlala lehlabatheng la nako;

Mehlala, eo mohlomong e mong,
Ea sesisang bophelong bo mahlonoko,
Moena ea nyahameng a robehetsoe ke sekepe,
Ha a bona, a boele a kothale.

⁴² Ke hopola *Pesalema Ea Bophelo*, seroki se seholo sa Monyesemane, Longfellow, mohla a na e ngola. Nkile ka ema lebitleng la hae, likhoeli tse 'maloa tse fetileng mona. Ka hopola lithoko tsa hae tse kholo tseo a li fileng lefats'e, 'me ka... *Pesalema Ea Bophelo* e sa le e 'ngoe ea lithatohatse tsa ka. E sa le lefu le ts'osa kamehla. Motha a le ts'aba, e sa le ho tloha ts'imolohong. Morao koana, ho tloha Ts'imong ea Edene, motho a ts'aba lefu.

⁴³ Ke hopola moperofeta e moholo, Jobo, mohla a lutseng mono 'me a tseba hoba o a tsamaea. O buile ka lithero tse kholo mono, tseo re li fumanang ho Jobo 14. Kamoo a eleletsoeng lipalesa; kamoo li shoeleng le ho boela li tsoha. Kamoo a eleletsoeng lifate; ha se lihuoa ke moea, se petsoha, moea o se petsola. "Se shoele, empa se tla boela se phela," a rialo. "Ha marotholi a 'maloa a—a metsi a se nela, ee," o rialo, "se a phela." Re sheba e—e—e liphoofolo tsa rona, le ntho tse joalo, ha li phela li boela li eshoa. Ntho eohle e sisinyehang, mohla e shoang, ha e sa hlola e phela.

⁴⁴ Ka hona Jobo a ipotsa ho ea ka'ng ha Molimo o ka nka palesa oa boela oa e phelisa, athe eena ha a hlole a phela hape. A re, "Ee, motho o neela moea, o fela matla, 'me o kae?" A re, "Bara ba hae ba tlela ho mo hlompha, empa ha a lemohe." Eaba o re, "Oh, hola U ka mpata lebitleng, hola U ka mpoloka nqalang e sephiring, khalefo ea Hao ea ba ea feta. U mpeetse linako le litlamo, 'me ke sitoa ho feta. Empa hola U ka mpoloka nqalang e sephiring ho fihlela letsatsi la khalefo ea Hao..."

⁴⁵ Hantle khabareng ea tsieleho ea hae, hantle horeng e lefifi-fifi, motsotsong oo o moholo o mahlonoko, eaba ho fihla Elihu e monyenyan 'me a qalella ho bua le eena; a 'molella hobane palesa ha eso etse sebe; hore ke eena ea entseng sebe, le hore tsoho e tla ba teng. "Ka tsatsi le leng Ea Lokileng Ea tla fihla o teng, ea entsoeng ka sets'oano sa lefats'e lena, le ka sebopaho sa sets'oants'o sa Molimo, a entsoe ka mokhoa oa motho. O tla apara sebopaho sa nama ea sebe, ka mantsoe a mang, 'me a eme sekheong sa Molimo o befileng, le o halalelang le motho ea tletseng sebe, le ho beha matsoho a Hae holima bona ba babeli le ho hokanya tsela."

⁴⁶ 'Me eare ha Jobo a bona seo, o ne a shebile tsoho ea Morena. O e bone. Joale lemohang. Ka mantsoe a mang, Jobo a leka ho fumana taba ena, ho re, "Ke a tseba hobane ha motho a kena leroleng la lefats'e, o a bola o a fela. Ke a mo elelloa. Ha a boele a tsoha. O a robala 'me o neela moea, 'me o felile. 'Me o kae? Ha ho ea tsebang moo a leng teng. Empa ke lemoahile hoba lintho tse ling li tsoha bafung, empa ha ho joalo ka eena."

⁴⁷ Eitse ha moporofeta enoa a kena Moeeng, Molimo oa qala oa 'monts'a se neng se tla etsahala; ho tla fihla E mong Ea tla tlosa sebe sa lefats'e, 'me o tla boela a tsoha. A bona tsoho ea Morena. Joale, ke rata hoo, ha ke nahana. A re o ile a ema. A itlhohloria.

⁴⁸ O na a lutse thotobolong ea molora. Khele! Hoo kajeno, re ho bitsang, bomolimabe bo oetseng lapa la hae. Bana ba hae ba shoa kaofela. Maruo a hae a fela oohle. Bophelo ba hae bo thekesela. Eena a lutse, Mokreste, kapa molumeli, a lutse, a lahliloe. Batho, esita le kereke ea hae, ba mo furaletse. Eena a lutse mono, a ikhoabitla mathopa a hae.

⁴⁹ 'Me eitse ha Moea oa Molimo o theohela holima hae, 'me a bona tsoho hoseng hona, le a tseba, a ema, 'me a re, "Kea tseba Molopelli oa ka oa phela, 'me O tla ema holima lefats'e matsatsing a qetelo. Leha liboko tsa letlalo li se li sentse 'mele oona, empa ke tla bona Molimo ke se ke le nameng ea ka; Eo ke tla ipo...." A tseba hore o tla 'Mona matsatsing a qetelo, hoba tsoho e tla ba teng, tsoho e akaretsang.

⁵⁰ Ke hopola Davida, mohla a tsfalang. Morena e moholo joalo ka eena, Molimo o n'o mo hlapanyelitse, ka litholoana tsa

letheka o tla tsosa Kreste ea tla lula letsohong le letona la Hae. Ebe ke bona Davida, a se a tsofetse, a fihla pheletsong ea tsela ea hae, le matla a 'mele a se a felile. A re, "Etsoe, nama ea ka e tla phomola ka ts'epo, hoba A ke ke a tlohela Mokhethoa oa Hae ho bona ho bola; kapa A tlohela moea oa Hae liheleng." O bonetse Jesu pele, tsoho ea Kreste; le ho tseba hobane 'mele oa Hae o ke ke oa lula leroleng la lefats'e, empa o tla boela a tsoha.

⁵¹ Ke hopola Abrahama morao koana mohla Molimo o mo lulisang fats'e, le ho re, "Joale, Abrahama, o a tsofala, o tlotse lilemo, uena le Sara bobeli. Empa, o tlotse lilemo tsa ho fumana bana, empa Ke tla u fa mora oa ts'episo." E ntoo ba kamoo Abrahama a keneng leetong la Hae le ho kena lefats'eng la ts'episo, le ho shebella nako ea ho fihla ha ea bokoang enoa mono, ea n'a tla bapisa Kreste Jesu.

⁵² 'Me ka mora lilemo tse mashome a mabeli le metso e mehlano tsa ho lumela pallo ena, pejana feela ts'episo e etsoa, eaba moo Molimo o iponts'ang Abrahama, le ho 'monts'a ho re, ka lefu, O tla thakhisa Mora oa Hae; 'me, tsohong, A boele a Mo tsose, le ho Mo fa tsohle. A etsa hore liriti li hlolehe, lintho tsohle tseo e sa le li oka-okela motho, le lefu, le bots'abeho bo neng bo fuperoe ke lefu, bo tla ponan, ha ba bona taba ena.

⁵³ A ntoo hlahisetsa Abrahama oa khale ponelo-pele ea eona, 'me A feta lipakeng tsa mekheketho ena ea liphoofolo tseo a li khekhethileng. Etsoe, re sa tsoa e qotsa liveke tse 'maloa tse fetileng, kapa veke e fetileng, ke rialo, kapa veke ea maoba, lits'ebeletsong tsa rona; kamoo A tsamaisitseng Leseli le le nyenyane lena le lesoue, lona e ne e le Molimo, le tle le fete lipakeng tsa lintho tsena, ho thasisetsa kano ea selekane.

⁵⁴ Le ho khutla ho hlohonolofatsa Abrahama; homme leqheku la lilemo tse lekholo, le mosali a le mashome a robong, ho fetoha mohlankana le moroetsana hape, le ho hlahisa mo—mora, Isaaka. Eo, ho eena, ho tsoang Peo ea Abrahama. Ho tsoa ho Abra... Ho tsoa moo, ho Isaaka, ho tsoa Davida; ho Davida ho tsoa Kreste; ho Kreste ho tsoa tsoho ea bafu. Ke ts'episo e tlotlehang hakakang! Kamoo Molimo mongoaheng a bonts'itseng tsena tsohle ka liriti!

⁵⁵ Eaba, qetellong, joale ka ha re ne re e nkile matsatsing a 'maloa a fetileng, e le motheo, kaha kamoo batho bohle, baporofeta bohle ba Testamente ea Khale, ba hloaileng sets'a sa lepato la bona.

⁵⁶ Kajeno le tla ea sets'eng sa bafu, bongata ba lona, le bee lipalesa holima baratuoa ba lona, kapa mabitleng a bona.

⁵⁷ Joale le hlokomele taba ena. Baporofeta bohle ba khale, ba ne ba se na Lengolo leo ba tsamaeang ka lona, joalo ka ha rona re na le lona, ts'episo efe feela ea Molimo e Khethethileng, ha e

se ka boetapele ba Moea o Halalelang feela. "Batho ba boholoholo, ba ngotse Lentsoe la Molimo, kamoo ba ne ba susumetsoa ke Moea o Halalelang." E mong le e mong oa bona, ha ba eshoa, ba hloaile hore ba batla ho patoa Palestina. Ba ne ba sa batle ho... Ba shoeletse ka ntle ho Palestina, bongata ba bona, empa ba batla ho pateloa Palestina hobane Molimo o nts'itse lithakangoaha tsa tsoho Palestina.

⁵⁸ Eaba ho fihla Jesu, 'me ba Mo etsa kamoo ho itsoeng ba tla etsa. Mohla a n'a tsoalloa Bethlehem, O kene ka monyako oa setala, a tsoa ka kahlolo ea lefu. Mohla A n'a le lefats'eng mona, ha A tsamaea leeto la limaele tse mashome a mahlano bophelong ba Hae. A se ke a ea kae kapa kae; ho potoloha Palestina, empa Molaetsa oa Evangelie ea Hae o fihlile lepatsong le leng le le leng le khutloaneng ea lefats'e.

⁵⁹ Ha A ka a ngola buka bophelong ba Hae; empa Buka, e ngotsoeng ka Eena, e rekisitsoe ho feta tsohle mengoaheng eohle, Bibebe. 'Me leha ho le joalo, ka hare ka mono, ha A eso ka a... Bophelong ba Hae ha a kena kholeshe ea thupelo, empa ho na le likholeshe tsa thupelo tse ngata ka ho fetisisa tse hahetsoeng ho Mo hlompha, ho feta—ho feta ntho efe feela e kileng ea ba teng lefats'eng, kapa lebitso lefe feela kapa monna ofe feela. 'Me ha A ka a tsamaela hole. O phetse bophelo bo ikokobelitseng, bo ithobileng. A songoa, a nyefoloa, a ts'ehuoa.

⁶⁰ 'Me O itse o na le matla a ho tlosa Bophelo ba Hae, le matla a ho bo tsosa. Motho mang le mang a ka iphafa joalo, mang le mang a ka khona. Empa a kholisa tseko ea Hae ha A tsoha hoseng ha Paseka.

⁶¹ Mohla, ba hlabang matsoho a Hae, le a Hae—le maoto a Hae, le lehlakore la Hae; le mofapahloho oa meutloa holima hloho ea Hae. 'Me A shoa, koana, a hoeletsa ho hauheloa, mane Kalvari. Mohla A n'a le lefats'eng, O ne a ts'oana le monna 'me A its'oere joalo ka monna. Le mohla A n'a shoa mane Kalvari, A hoeletsa ho hauheloa, joale ka monna.

⁶² Empa ha A tsoha, hoseng ha Paseka, A kholisa A ne a fetisa monna. E ne e le Molimo. A ena le matla a ho bea bophelo ba Hae fats'e.

⁶³ Joale, ntho ea pele, hoseng, sehlotsoana sa barutuoa se ne se robephile lipelo kaofela. Ba sa tsebe se etsahetseng. Ba bang ba bona ba batla ho khutlela matlooeng a bona a lihlapi.

⁶⁴ Joale pono-pele ea seo lefu le ne le le sona, le kamoo lefu le ne le nyarosa kateng, le ho bathei ho theoha le borapeli ba rona ba Bokreste, kamoo lits'episo li filoeng bapatriareka bao ke buileng ka bona hoseng hona. Joale ha re eeng hae hantle, moo e leng hona teng.

⁶⁵ Barutuoanyana bana, hoba ba...lemuloana le neng le hlouoe qalong. Ba se na metsoalle e mengata ea lefats'e lena.

⁶⁶ 'Me monna e mong le e mong ea sebeletsang Jesu Kreste a ke ke a ba le metsoalle e mengata ea lefats'e lena. U lokela ho emela likholiseho tsa hao, u le mong. Hangata u lokela ho ema u le mong, empa O ts'episitse hore O tla ema le uena. "Ke tla ba le uena esita le ho isa pheletsong."

⁶⁷ 'Me joale, ha ke 'Mona, ha re e shebeng. O tlositsoe, ba ne ba lebeletse, kahobane A khonne ho etsa mehlolo. 'Me O boletse a sa etse letho, ka boEena, haese seo Ntate a 'Monts'itseng. Empa E—E le ramehlolo-hlolo. 'Me mohla A n'a neeloa matsohong a Pilato, ba ne ba ka lebella joang ho bona Messia oa Molimo a hlobolisoa, liaparo tsa Hae, le ho ema mono; le ho shapuo, le ho tetekoa, le ho phets'elakoa, le ho pshatloa, le ho ts'oeloa ka mathe, homme A sa ahlamise molomo oa Hae le ho buoa lentsoe ka eona. Hoo ho ne ho robile lipelo tsa bona.

⁶⁸ Eena Monna ea khonneng ho otolla letsoho la Hae, le ho re, "Khutsa hle," homme A utluoe ke meeа le maqhubu.

⁶⁹ Eena ea na ka emisa mokoloko oa phupu, le ho bea letsoho la Hae holima lekese, le ho re, "Mohlankana, Ke re ho uena, tsoha," a ntoo tsoa.

⁷⁰ Eena ea keneng lapeng le robehileng lipelo, moo morali a sa tsoa shoa teng; Jariuse, mopristantana ea na tla ikamahanya le Jesu, 'me e le molumeli. 'Me A kene, ho re, "Khutsang, hobane moroetsana ha a shoa; o robetse." Ba loketse ba be ba tsebile ruri. Ruri ntho e ne e le teng mono. A kena, a mo ts'oara ka letsoho; a mo talima, le ho re, "Mosetsana, Ke re ho uena, tsoha." 'Me ngoanana ea na shoele, le moea oa hae o tsamaile, a ema ka maoto a hae 'me a boela a phela.

⁷¹ Kamoo A ileng lebitleng la Lazaro, a lla joalo ka motho, likeleli li leketla marameng a Hae, ha A lla A bile a eme mono. 'Me monna ea shoeleng matsatsi a mane, le liboko tsa letlalo li nyeunya 'meleng oa hae. Empa ak'u 'Mone ha A ts'opholla 'mejana oa Hae joalo, hore, "Ke 'Na tsoho le Bophelo. Ea lumela ho 'Na, leha a shoele, o tla phela. Ea phelang 'me a lumela ho 'Na a ke ke a shoa." E nahaneng. "Ea phelang 'me a lumela ho 'Na a ke ke a shoa."

⁷² Re na le ts'epo e kakang hoseng hona, he, ha re etela mabitla a rona, ho baratuoa ba rona! Re na le ts'epo e kakang nameng ena e shoang, kajeno, joale ka ha Moea o Halalelang o paka, "O a phela! 'A ke ke a shoa; o na le Bophelo bo sa feleng." Empa leha ho le joalo re isa 'mebele ea bahalaleli ba fetisisang hara rona lebitleng, empa ka hare ba a phela. Ba phela tulong e 'ngoe.

⁷³ Mohla A na ema, ho re, "Ke 'Na tsoho le Bophelo," 'me ho ena le monna ea robetseng mono. A re, "Tlosang lejoe." 'Me ho ho silafala ha 'mele oa hae, lephoka la 'mele oa motho, le tseba

kamoo le leng kateng. Eitse ha ba phahama, khele, lephoka la teng le kulisa mono. Empa A bua, 'me a re, "Lazaro, tsoa moo!"' Me monna ea shoeleng matsatsi a mane, a tsoha lebitleng.

⁷⁴ Ho tla kang ha ba bona Monna ea matla a mofuta oo, a leketla Kalvari, ka likhohlela tse kholo tsa sesomo, sa mathe a masole, a na Mo nyefola, a lepella litelung tsa Hae; nakong eo ba rutlang sehlahla sa litelu sefahlehong sa Hae, le ho Mo bata hlohong, 'me ho thoe, "Porofeta u bolele ea U batileng!" Mohla ba bonang lithakhisa tsa Roma li sotetsoa matsohong a Hae le maotong a Hae, ho tla joang ha ba bona Monna ea joalo a eshoa? Hobane, Molimo o batlile kotlo, 'me Kreste o nkile kotlo ea rona.

⁷⁵ Kamoo ba ne ba soabile! Ba se ba khutletse matlooeng a bona a lihlapi. Petrose a re, "Ke tla ea ts'oasa lihlapi." Barutuo ba re, "Ke tla ea le uena." Ba ikela. Bohle ba utloile bohloko, ba soabile.

⁷⁶ Ke bao ba theola 'mele oa Hae, ba O phuthela ka line, ba O robatsa lebitleng.

⁷⁷ Le ho re, "Ke eo pheletso ea mokhelohi eo." Kamoo lefats'e le ne le eme khahlano le Eena! Ba re, "E ne e le mohalaleli ea thethehang. O ne a hlanya. E ne e—E ne e le mokhelohi, le joalo-joalo."

⁷⁸ Empa O itse E ne e le Molimo. O ne a ts'oana le Eena. A its'oere joalo ka Eena. A kholisa hore E ne e le Molimo. Ke hantle.

⁷⁹ Mosali o buile, hase khale haholo, joale kaha ke boletse taba ena hangata. A re, "O ne a sa Halalele, Moena Branham." Mosali oa Bokreste ba Mahlale, a re, "E ne e mpa e le monna feela." Ho re, "E ne e le monna feela."

⁸⁰ Ka re, "O ne a fetisa monna. E ne e le Molimo." Ka re, "E ne e le Molimo kapa mothetsi."

⁸¹ A re, "Che, kahobane A ile a lla lebitleng la Lazaro, O pakile E se letho haese monna feela."

⁸² Ka re, "Ha A na lla, O llile joale ka monna. Empa eitse ha A tsosa bafu, A paka hobane E ne e le Molimo." Ke hantle. Ka re, "Ha A na lapile, O ile a lapa joalo ka motho."

⁸³ Empa nahanang ka monna ea emeng pel'a sefate sa feiga a leka ho fumana ho jeoang; 'me matsatsi a 'maloa hamorao, a nke libasekeiti tse peli, le likotoana tse peli kapa tse tharo tsa hlapi, 'me a fepe batho ba likete tse hlano ka hlapi e phehuoeng!

⁸⁴ Le nahane ka monna ea emeng Kalvari, a leketla mono pakeng tsa Leholimo le lefatsho, a lla, "Ke nyoriloe, Ke nyoriloe"; homme a fetole metsi veine! Eena 'Mopi oa—oa metsi, a eme mono, a llela metsi!

⁸⁵ O fetohile sebe sebakeng sa rona, hore rona, ka bofuma ba Hae—bofuma re tle re ruisoe. Eena, lefung la Hae, O shoele joale ka moetsalibe; hore rona, lefung la rona, re shoe joale ka bara le barali ba Molimo.

⁸⁶ Ke nahana ka phapang e kana pakeng tsa mafu. Daddy Hayes oa khale tlase mona, mohla a na shoa, a biletsha bana ba hae pela moalo. 'Me mono, a ile a ilibana matsatsi a mabeli kapa a mararo. A iqapetse puo, a re, "Moratuo, boka moea oa me!" A le hohle... A biletsha bana ba hae pel'a moalo. Ka litelu tse telele, tse ts'oeu, tse gefohang; a re, "Moratuo, boka moea oa me! Le ne le nahanne hobane Daddy Hayes o shoele." A re, "Nke ke ka shoa. Kahobane Jesu a phela, le 'na kea phela." 'Me mono a hlohonolofatsa e mong le e mong oa bana ba hae.

⁸⁷ Ho re, "Phahamisang matsoho a ka." A sa khone ho phahamisa matsoho a hae. Eaba e mong oa bara ba hae o ema lehlakoreng le leng, a phahamisa letsoho *leo*, e mong a phahamisa letsoho lane. A qalella ho bina. Eare ha mahlo a hae a qalella ho sheba nqa Leholidong, a re, "Tsatsi la thabo, tsatsi la thabo, esale Jesu a hlatsoa libe tsa ka! A nthuta ho—ho rapela le ho phela ka nyakallo tsatsi ka leng." Eaba o koala mahlo a hae, a tsoa ho ea kopana le Molimo. Ke a le bolella, ke batla ho tsamaea joalo. Ke eona tsela. Nke ke shoele ho Jesu Kreste.

⁸⁸ Eare hobane barutua ba Hae ba bone hoo, masoabi oohle le lintho tsohle, ha—ha—ha e le moo A entse joalo, ea ka, o ba phoqile. Ba qala ba khutla kaofela, ho ea ts'oasa lihlapi. E mong a khutlela mosebetsing oa hae, le e mong a khutla ka tsela *ena*.

⁸⁹ Joale hoseng hona re batla ho qala ka lebitleng. Joale ka mora tsoho ea Hae, Maria, Marethia, le Maria—Maria Magdalena, le Maria 'ma Jesu... E ne e le hoseng ho hong ho hoholo. Ba bolokile setopo sa Hae fats'e, ka baka la Sabatha, e le moetlo hore ba se etse letho ka letsatsi la Sabatha. Ka baka leo O shoele thapama ea Labohlano, ka hora ea boraro, 'me a tsoha ka Sontaha hoseng ho hoholo.

⁹⁰ Joale ke batla ho felisa khang ena, le sa lutse ts'ebeletsong ena ea chabo ea letsatsi hoseng hona. Boholo ba batho ba re, "Ho tla joang ha A itse o tla robala... O qetile matsatsi a mararo le masiu, lebitleng?" Le ka mohla ha A re o tla etsa joalo.

⁹¹ O itse, "Matsatsing a mararo ana Ke tla tsosa 'mele oa Ka." Le a bona? Joale, lebaka leo A entseng hono ke hobane Davida a na a boletse, tulong e 'ngoe Lengolong, "Nke ke ka tlohela moea oa Hae liheleng, nke ke ka lesa Mokhethoa oa Ka ho bona ho bola." A tseba hobane ho bola ho kena 'meleng oa motho ka mora lihora tse mashome a supileng le metso e 'meli, matsatsi a mararo le masiu. 'Me kae-kae matsatsing a mararo ao le masiu, Molimo o no o tla Mo tsosa. O shoele ka Labohlano ka hora ea boraro, 'me a tsoha hoseng ha Sontaha.

⁹² Joale ha re qotseng terama e nyenyane hantle mona le ho khefutsa nakoana le ho sheba. Eka kea 'Mona, bosiu bohle. Maria-nyana oa batho, 'me, pelo ea hae e hlabejile. Anna moporofeta oa mosali o ne a 'moleletse hobane o tla hlajoa, ho senola mehopolo ea ba bangata. Kamoo 'mele oa Hae o hlokofalitsoeng, le Lesea la hae le ratoang le leketla sefapanong, le lihlong tseo A li tliselitseng kereke. Empa leha ho le joalo, ka pelong ea hae, lerato leo la 'me la tsoa; ho ena le... ho sa tsottelehe seo A se entseng, lihlong tse kae. A shoa, kahlolo ea lefu, joale ka-ka mots'oarua oa kajeno ea ka tsoang mono, ho fanyehoa, kapa ho bolaoa ka motlakase, kapa ntho e 'ngoe. Ke kamoo A shoeleng kateng, ka masoabi le lihlong. Le bona kamoo Molimo a otgileng sebe? Le kamoo a ile a lla, mohlomong bosiu bohle! 'Me eena le... .

⁹³ Maria Magdalena, o ne a tseba matla a Hae. A tseba ho Eena ho ena le ntho e fapaneng le mang kapa mang. A kile a 'nts'oa matemona a supileng.

⁹⁴ Motho mang kapa mang ea kileng a lokolloa ho liabolose, ke matla a Jesu Kreste, ba tseba moo ba emeng teng. Ha ho motho ea ka fihlang, homme ka pel'a Sefahleho sa Hae se seholo se Halalelang, homme e be motho ea its'oanelang. U a-u a fetoha. Ho na le ntho e etsahalang ho uena. Oh, u ka ema ka thoko, le ka saekholoji, le ho nahana *sena*, le ho amohela *sena*, ntho e itseng, le mehopolo e itseng, kapa ntho e kang eo. Empa ha re lumela matleng a tsoho a Jesu Kreste. 'Me ha u fihla ka pel'a Sefahleho sa Hae, ho na le ntho e etsahalang bophelong ba hao, e u fetolang. 'Me u ke ke ua hlola u ts'oana, motho ea kileng a fihla ka pel'a Sefahleho sa Kreste.

⁹⁵ Ka baka leo ho ne ho nts'itsoe matemona a supileng ho eena. Boikhants'o le mohono, 'me a ipona a le motle haholo 'me ho se ea ts'oanang le eena. Empa eare ha Jesu a bua a re, "Ke re u hloeke," tseo tsohle tsa tloha ho eena. Ea eba motho e mocha. A sa hhole a le motle, mahlong a hae. A mpa a apara kobo ea bonolo le mosa, 'me a latela Monghali. O ne A Mo rata.

'Me ke 'mona hoseng ha Paseka.

⁹⁶ Barutuoa ba Hae ba tsoile, ba hula liketsoana tsa lihlapi; ba bang ba bona. Ba bang ba ikela hae. 'Me ba bang ba inkela tsela tse fapaneng; ho boela mesebetsing ea bona.

⁹⁷ Eaba hoseng haholo, ke bona Maria e leng 'me, hammoho le Maria Magdalena, ba nyoloha leralla, ho ea lebitleng. Ba ts'oere linoko le lintho. Ba batla ho tlotsa 'mele oa Hae le ho Mo pata.

⁹⁸ 'Me, ha ho le joalo, ha ba nyoloha leralla, eka ke bona ketsahalo e 'ngoe. A re nyareleng ka mona.

⁹⁹ Ke bona ho eme sehlopha sa masole mono. A ntse a bapala likarete, bosiu bohle, kapa—kapa ba thunya letaese, kapa ho bapala letaese la bona, e—e—e letaese fats'e. 'Me ba ile ba tsoella joalo. Ba bang ba bona ba re, "Helang, le hopola mothetsi eane? O itse O tla tsoha 'matsatsing a mararo'. Ka baka leo joale ha re shebeng feela. Ha re nyoloheleng lebitleng."

¹⁰⁰ 'Me ke ba bona ba nyoloha mono, ba ikotla sefuba sa bona, 'me ba tjeba lihlomohali tsa bona *joalo*, le sabole ea Moroma; ho re, "Re tla bona seo A ka se etsang!" Hobane, lebitla le ne le tiisitsoe, tiiso ea Roma; ho malimabe ea manollang tiiso eo. Lejoe le ne le beiloe mono, 'me ho qosa senturi ea banna; ke hore, ho ne ho qositse banna ba lekholo ho le phikolosetsa holimo mono, ba katile lebitla ka lejoe hali le leholo. Ho re, "O teng ka mono, o bolokehile ka polokeho!" 'Me ba kena monyakeng o moholo.

¹⁰¹ Empa khabareng, ha ho se ho ela joale, nakong eo Maria...ha ba nyoloha leralla. 'Me basajana ba babeli ke bao, ka ntle hoseng, mohlomong ba kopelane ka matsoho, ba tsamaea joalo. Oh! Oh, ehlide e ka re kea ba bona, kamoo ba ne ba tsamaea mosikong oa leralla. 'Me ke utloa Maria, e leng 'me, a re ho Maria Magdalena, "Hela, ke mang ea tla tlosa lejoe lebitleng? Ke eng? Re tla khona joang?"

¹⁰² Che, ke utloa Maria a arabela, "Molimo o tla iponela hoo."

¹⁰³ Ke eo ntho ea bohlokoao. Ho sa tsotelehe...Batho ba re, "Nka khona joang ho etsa *sena* kapa ho etsa *sane*?" Molimo o tla iponela hoo. Uena tsoelapele feela, u a bona. Molimo o tla iponela hoo hohle.

¹⁰⁴ Eaba, hang-hang, re bona linaleli li fifala. 'Me ntho ea pele lea tseba, ho setse naleli e le 'ngoe, ke e kholo eo, ke naleli e phatsimang ea meso koana.

¹⁰⁵ Ke lemoha kamoo lintho tsohle, homme masole a ntse a ts'eha a bile a nyefola. Ho re, "Joale, le a bona, letsatsi le chabile. Ha hoa etsahala letho." Ba 'na ba tsoella joalo, ho re, "Lea bona E ne e mpa e le mothetsi. E ne e mpa e le monna ea ts'oanang le sekhakhatha sena sa bathetsi ba hlahileng mehleng ena, le mehleng e meng, 'me ha etsoa lintho tsena, empa eaba...kapa ha etsoa maipolelo ana."

¹⁰⁶ Empa, eaba, hang feela, eka ke bona linonyana tsohle, bomaborokoane, tsa khaotsa ho bina. Linonyana tsa lesa ho bina. Seroki se re, "Mololi oa Lentsoe la Hae o khutsisa linonyana lipineng tsa tsona." Ntho e 'ngoe e ne e le mothating oa ho etsahala.

¹⁰⁷ Ke bona Naleli ea Meso e leketlile koana boholokoaneng ba Eona, E 'nile ea leketla mono esale qalong ea nako, ea qalella ho tsamaea. Ke E bona e likoloha selikalikoeng. Maria, bona,

ba E shebile. E etsa'ng? Ke Lengeloi, 'me Le qamaka lebitla leo ba Mo robalitseng ho lona. Lengolo le ne le le mothating oa ho phethahatsoa.

¹⁰⁸ Moena, khaitseli, nako le nako ha Lengolo la Molimo le le mothating oa ho phethahatsoa, u se ts'oenyeho, Le tla its'ebetsa hona moo.

¹⁰⁹ Ke bona Naleli eo e kena leetong la Eona, e potoloha. Ke bona Maroma a eme mono, lekholo la bona, le matla, ba nontse lisabole tsa bona, ho thoe, "Joale re tla bona se etsahalang!"

¹¹⁰ Eaba, hang, ho theoha khanarehali ena ea Mollo Leholimong e fofa, ea ema lebitleng. 'Me keha ho eme Lengeloi le leholo la Molimo mono. Masole a akheha 'me a oa ea ka banna ba shoeleng, fats'e. 'Me A le phikolosa, ka ho phaila ha seatla sa Hae, lejoe le neng le beiloe; ho roba tiiso ea Roma.

¹¹¹ Tiiso ea Roma e bolela'ng ho Eena? Le letho hakaale kaha tiiso ea Linaha tse Kopaneng e ka bua, kapa letho le sele, kapa tiiso ea kereke e 'ngoe, kapa eng feela e sele. Molimo o tlamehile ho phela. O tlamehile ho tsoa. A ke ke a phela hara bafu.

¹¹² Ha ho le joalo A phikolosa lejoe, 'me la phikoloha. 'Me A ema mono. Joale ke Mang ea busang? Masole a hoatola lithebe tsa oona le lintho, 'me a pepetlolotseha ka lebelo le bokhoning ba bona, ho parola ts'ingoana, ho lepella ka leralla; lekarakara la libetsa tsa bona, lits'epo tsa bona, lithebe tsa bona le lintho.

'Me A ema mono, a le mong. Ka mora nakoana, Maria a re...

¹¹³ Ha ba le ts'isinyeho e kholo ea lefats'e ha seo se etsahala, e sisintseng lona lefats'e mono hoseng hoo. Motho e mong o re, "Ke kholoa ho na le ntho e qhomeng kae-kae. Ho bile le... Eka ho-ho phatloha kae-kae, ha lehalima, kapa ntho e phaitseng lefats'e." Empa, e ne e le eona, Jesu o tsohile bafung.

¹¹⁴ Eitse ha ba atamela lebitleng, Maria le Marella, ba bona ho eme Lemgeloi mono. La re, "E-eang le bolelle barutuo ba Hae hore O tla ba etella pele ho ea Galelea, 'me O tla kopana le bona teng. Bonang, Ke le boleletse. Le phakise joale, le bolelle barutuo hore O tla kopana le bona joale ka ha A boletse A tla kopana le bona."

¹¹⁵ Oh, ha ke nahana ntho eo! "Ea utloang Mantsoe a Ka 'me a lumela ho Ea Nthomileng o na le Bophelo bo sa feleng, 'me 'Na ke tla mo tsosa matsatsing a qetelo."

¹¹⁶ "Bonang, Ke le boleletse." Mangeloi a Hae a phatlalalitse hoo lefats'e ka bophara, ho re, "Mang le mang ea itelang, 'me a nka sefapano sa hae a Mo latela, O tla kopana le uena tsohong." Ho bolela'ng leha re ka hasa lipalesa holima lebitla, ha re ka re "molora moloreng, le lerole leroleng"? 'Mele oo o tla tsoha lebitleng joale ka ha Molimo a le teng Leholimong. "Bonang, Ke le boleletse."

¹¹⁷ Ha re hlokomeleng. Barutuo ba Hae ba babeli ke bana ba tsamaea mona joale. Ba tsamaea tseleng.

¹¹⁸ 'Me ba bang ba tsoile ho ea ts'oasa lihlapi. 'Me ka hona Jesu o n'a eme lebopong, 'me A sheba ka ntle, 'me A ba bona ka ntle mono. 'Me A re, "Baena, le na le bohobe na?"

¹¹⁹ Ntho ea pele A e buileng ho bona, ho re, "Lahlelang matlooa a lona lehlakoreng lane." Ba ts'oasitse bosiu bohle, ba sa ts'oara letho. Ho joalo; le ts'oasa ka lehlakoreng le phoso la sekepe. Ka baka leo Jesu a re, "Lahlelang letlooa la lona lehlakoreng lane."

¹²⁰ 'Me eitse ha ba lahela letlooa la bona lehlakoreng lane, 'me ba hula joalo, khele, ho ena lihlapi tse ngata hoo matlooa a bona a batlileng a taboha.

¹²¹ 'Me Petrose a qala a qamaka, ho re, "Monna o mong feela ea na ka etsa hoo." 'Me a sheba morao lebopong, 'me keha A eme mono; bohobe le hlapi li beiloe mollong, li lokiselitsoe bona. Petrose a se ke a emela sekepe ho fihla. A its'ohlometsa metsing, 'me a tloha, ho kopana le Eena. O na loketse ho phakisa.

¹²² Oh, eka moetsalibe e mong le e mong lefats'eng a ka ba joalo, kajeno. Petrose a kile a Mo latola tlase mono. A tsoa a lla, habohloko. O ne a rapetse. A batla ho kopana le Jesu. A batla ho fihla moo a tle a itihele maotong a Hae.

¹²³ Ha ba le ba babeli ka lebitso, e mong Kleopa, le joalo-joalo. Ba le tseleng ea bona e eang Emmause. 'Me ba ntse ba tsamaea joalo, ka pelo tse bohloko, tse robehileng. 'Me ba ntse ba tsamaea, ba bua ka eona, oh, ho le hobe hakakang. 'Me hang, Motho a hlaha lihlahleng; Monna ea tloaelehileng feela, molala oa hempe ea Hae o sa hetla morao, kapa ka moaparo o fapaneng.

¹²⁴ A apere joale ka batho bohle. Moriri oa Hae le litelu tsa Hae li ts'oana le tsa ba bang bohle. A sa...A sa fapanana ka letho. A sa etse phapang ea letho e kholo. Bophelo ba Hae bo pakile ka lits'oanelo tsa Hae, seo A n'a le sona. 'Me ke seo Molimo a batlang re be sona, o batla ha maphelo a rona e le lits'oanelo tsa rona. Ke hantle.

¹²⁵ 'Me eaba O qalella ho tsamaea. A re, "Banab'eso, le hloname ke'ng? Le hona hobaneng le bua taba tsena?" Oh, ke mpa ke rata hoo!

¹²⁶ "Khele," ba re, "na U moeti koano, Monghali? Hobaneng," a re, "naha eohle e tepeletse. 'Me ke rona bana," a rialo, "re leetong la rona, re khutlela hae." A re, "Khele, Jesu oa Nazaretha, Moporofeta, re ne re hopotse A tla khona ruri, mohla A fihlang, E be Morena oa Iseraele. 'Me joale O shoele, 'me ba Mo patile. Ba bile ba hlabilo pelo ea Hae. 'Me ba Mo tlositse." Le ho re, "Lena e se e le letsatsi la boraro ho

etsahetse, ho tloha A bolailoe.” Ho re, “Koana basali ba bang ba ne ba theohetse lebitleng homme—homme ba bone pono ea Mangeloi, ’me ba khutla ba re O a phela. Empa,” ho re, “oh, re ke ke ra lumela pale eo. Re a tsamaea.”

¹²⁷ Ho tsamaea moo he, A re, “Lithoto, tse pelo li botsoa, le a bona, le sitoa ho lumela tsohle tse boletsoeng ke baporofeta bohole mabapi le Kreste, kamoo e ka khonang A utloe bohloko, le ho tsoha ka letsatsi la boraro. Che, le bohlasoa hakakang!”

¹²⁸ Shebang kamoo ho leng hottle! Banna! Shebang hona, Kreste hara ba hlomohileng le ba pelo li robehileng! Ke hona moo A tsamaeang teng, hara ba hlomohileng le pelo li robehile.

¹²⁹ Ba tsamaea horeng e lefifi ka ho fetisisa eo ba kileng ba e bona. Lits’epo tsa bona tsohle li felile. Ba nts’itsoe kerekeng, masinagoge, hoba ba lumetse ho Eena. ’Me joale Eena, Eo ba ne ba its’episitse eena, o n’ a shoele. ’Me basali ba bang ba tla ka palenyana ea pono, ba bone Mangeloi a ’maloa, “Bolellang barutuoa ba Hae hore O tla kopana le bona Galelea.” Empa, oh, o mpa feela...Ba ke ke ba e lumela. Ba ne ba robehile lipelo ba bile ba hlomohile, ba lla. ’Me ke moo ho hlaha Jesu ea ratehang, hara ba robehileng lipelo.

¹³⁰ Ntho e ’ngoe, e le hoseng ha Paseka ea pele. Jesu, tsoho ea bophelo bohole, o na phela homme a le sehleng sa selemo, hara meloli ea linonyana, nakong eo lipalesa tse ncha li hlahang. Jesu ea tsohileng a le sehleng sa selemo, le eena, a tsoa e—e tsohong.

¹³¹ Kamoo A tsamaileng le bona mono, le ho qalella ho buisana le bona, ho ba phethela. Ho re, “Che, joale, eka khona le lumele seo baporofeta ba se boletseng. Le tlamehile ho lumela, tsohle tseo Mangolo a li ngolileng, malebana le Kreste; kamoo A ts’oanetseng ho utloa bohloko, le hotsoha hape ka letsatsi la boraro, le tse joalo.” Che, ba ne ba robehile lipelo hakakang.

¹³² Ka mora nakoana, hoba A qalelle ho bua, ho ena le ntho e buang ka Monna enoa e batlang e fapane le banna ba bang. E se monna oa lesika le lekanang le la ba bang. Ho ena le ho kang bots’ephei bo tebileng ho Eena. Ho ena le ntho e letsang lekolilo teng, eaba O qala a hlalosa Mangolo. E ne e le Moruti oa Mangolo; kaha kamoo baporofeta ba boletseng Kreste a tla shoa, le ho tsoha hape ka letsatsi la boraro. Kamoo lipelo tsa bona li ileng tsa qala ho chesa ka ho bona! Ntho e ’ngoe e ne e etsahala.

¹³³ ’Me ha ba ntse ba tsamaea, ba buisana letsatsi lohle. Joale ba se ba tsamaile lifelone tse ’maloa, e ka ba maele le halofo, ho tloha Jerusalema, ba ntse ba ea. Ba tsamaea butle, hantle le eena Jesu ea tsohileng, ’me ba sa ho tsebe.

¹³⁴ Ke hakae A lula le uena setulong! Ke hakae A ema le uena lihoreng tsa liteko tsa hao le litsietsi, ’me u sa elelloe! Ke hakae

A lutse lebiling la hao mohla u batlang u bolaoa kotsing eane, kapa ua qoba kotsi eo kapa ntho e 'ngoe, 'me ua se ke ua elella hobane e ne e le Eena! Ka moo A bileng le uena mohla faki e ne e le feela, le lefiso le omme, 'me masea a se na letho; kamoo monna eo a tlileng a bea likorosari tseo monyako, seo e ne e ka ba sona! E ne e le Kreste eo. O a phela kajeno. Ha A shoa, empa O a phela.

¹³⁵ Meso e 'maloa e fetileng, ke ne ke eme pela ngaka ea mohetene, koana Louisville. O ne a...Ke theohile, hoba ke khutle Afrika. Ba ntlhahlobela amoeba. A re, "Mor. Branham," a re, "homme u lumela e le boootla . . .?"

Ka re, "E, monghali."

¹³⁶ 'Me a re, "U mpolella hore u lumela hore Monna eo o tsohile bafung?"

Ka re, "E, monghali, kea e lumela."

¹³⁷ 'Me a re, "U ka paka joang hore U tsohile bafung?"

Ka re, "Nka paka hore ke Kreste ea tsohileng."

"A ka khona joang?"

¹³⁸ Ka re, "O phela pelong ea ka. Ke tseba ka hona hore U khonne. Ka hare ka *mona*, O mphetotse ho tsoa ho moetsalibe ho ea ho Mokreste. O fetotse tlhaho ea ka. O fetotse mekhoa ea ka. O fetotse tsohle tse neng li le ka ho 'na. O nkentse sebopuoa se secha. Ka baka leo kea tseba, ka bonna, hore O tsohile bafung."

A re, "Ke lumela hore O shoele."

¹³⁹ Ka—ka re, "Le 'na, ke etsa joalo. Empa, O shoele. Ee, ho feta moo, O tsohile bafung."

¹⁴⁰ 'Me kajeno O phela ka hara lipelo tsa rona. Ke ka baka leo re thabileng re bile re ka khona ho bina. Ke ka baka leo re Mo lemohang. Ha se khale haholo mona, Jesu Kreste, Mora oa Molimo, a nketsetsa mohlololo o moholo bophelong ba ka. O le etselitse mohlololo. O tsamaea le lona kamehla. O tsamaea le molumeli ka mong. "Bonang, Ke na le lona kamehla eohle, esita le ho isa bofelong ba lefats'e." Ho sa tsotelehe se tlang kapa se tsamaeang, Kreste o ntse a phela a bile a busa pelong ea motho kajeno.

¹⁴¹ Ke ka baka leo, joale ka ha pale e boletse; le hlokomele, hoseng ho hong le ho hong, re tsoha re luma-luma, 'me rea tsoa, 'me, "Che, ke batla ke phaphame," le joalo-joalo. Ha ho makatse re na le khatello e holimo ea mali, le lefu la tsoekere, le ntho tsohle.

¹⁴² Shebang maborokoane e monyenyanne. E ee e tsohe, hoseng ho hong le ho hong, ntho ea pele, e lahlela fahlehonyana sa eona nqa maholimong 'me e qalelle ho bina ka lentsoe lohle la eona. Ha u eso bone le e 'ngoe ea tsona e na le khatello e holimo ea mali, e tsamaea ka melangoana, e ts'oeroe ke lefu la tsoekere.

¹⁴³ Ho thoe, maborokoane e monyenyan e kile a bua, ka nako e 'ngoe, ho re, "Che, kea ipotsa bothata bo hokae," ho re, "batho bana, lintho tsena, le libopuo a tsena tse ipitsang batho?" Ho re, "Khele, ba ts'oanetse ho hlonama ha kana. Mohlomong ha ba na Ntate ea Maholimong ea ts'oanang le oa rona, ea re hlokamelang."

¹⁴⁴ Bosiu bo bong, ha ke ts'oere kopano mona kerekeng ea Milltown Baptist, ke sa le molisa mono. Ke ee hae le motsoalle oa ka oa khale, ho lula bosiu bohole. 'Me ke ne ke ee ke lemohe, ha ke feta, ho ena le nightingale e lutseng sehlahleng sa kedare mono. E bine bosiu bohole ka lentsoe lohle la eona, ka bophefa bo khonehang. Ka utloisia hantle hobaneng linonyana li bina ha letsatsi le chabile. Kea khlooa mahlaseli a letsatsi a li tolisang, a etsa hore li bine. Empa nightingale eo e bints'oa ke'ng?

¹⁴⁵ Ka baka leo ka iphumanela buka 'me ka qala ka bala ka nightingale. Ka fumana hore, nightingale, ntho e e bints'ang, ke hore e sheba maholimo. 'Me nako le nako ha e sheba 'me e bona maru a apoha, le ho bona naleli e le 'ngoe, lehlaseli le le leng la leseli, e qala e hoeletsa 'me e bina ka lentsoe la eona le phefa. Hobaneng? Hobane ea tseba hore letsatsi le chabile kae-kae. E bolella lefats'e hore kae-kae letsatsi le chabile.

¹⁴⁶ 'Me, moena, khaitseli, ha feela tlase botebong ba pelo ea ka, hara maru a mats'o a mats'oenyeho, le liteko le litsietsi, ha ke utloa Moea o Halalelang o phunyeletsa hang ka nako, 'me o ntlhohonolofatsa, kea tseba Matla a Molimo a ntse a phela a bile a busa sebakeng se seng. Ke hantle.

¹⁴⁷ Hola nka botsa naleli eo ea meso, "U phatsimisoa ke eng mono? Hobaneng u phatsima?"

¹⁴⁸ E ne e tla re, "Ha se 'na ea phatsimang, Moena Branham," hola naleli e ka bua. "Ke mpa ke chabeloa ke letsatsi, ke lona le mphatsimisang."

¹⁴⁹ 'Me ho joalo le ka motho e mong le e mong eo e leng molumeli ho Jesu Kreste, ea patiloeng ka ho Eena. Ha se uena ea phatsimang, ke Moea o Halalelang o u chabelang, o u fang ts'epo ena le thabo ena ea tsoho.

¹⁵⁰ Ke ne ke ee ke bue ka eona, ho bua tlase mona, ka seliba sa khale seo ke ne ke tloaetse ho noa ho sona. Se ne se bulula se bile se tlolaka, le ho tlolaka le ho tlolaka, tlase tikolohong ea Milltown. Ke ipotse hobaneng seliba seo se tlolaka, ka hona tsatsi le leng ka lula fats'e mono 'me ka qoqa le sona. Le nahangang ka monna ea qoqang le seliba? Empa ke ne ke bua le Tlhaho E entseng seliba. 'Me ka ipotsa, "Seo u etsang hore u bulule ke'ng, ho tlolaka hakaale? Na ke hoba—hoba bana ba tla mona ho noa ho uena, kapa hobane ke noa ho uena, kapa ntho e 'ngoe?"

¹⁵¹ Hola seliba se ka arabela, se ne se tla re, “Che, Billy, hase hobane u noa ho ‘na. Hase hobane motho mang le mang a noa ho ‘na. Ke ntho e ‘ngoe tlas’ a ka mona, e susumetsang ‘me e nketsa hore ke bulule le ho tlolaka, le ho its’ oara ka tsela ena.”

¹⁵² Ho joalo, monna ka mong kapa mosali ea tsoetsoeng ke Moea oa Molimo. Hase uena. Hase maikutlo a motho. Ke hobane tsoho, kapa Matla a Molimo, a lutse bophelong ba motho eo, ‘me a hatella nqa Bophelo bo se nang bofelo, ho kena Bophelong bo sa Feleng. Ntho e ‘ngoe ka hare ka mona! U ke ke ua ikhutsetsa leha u ts’oanetse. Ho na le ntho ka hare ho uena.

¹⁵³ Mohla Jesu a ne a fihla, a kena Jerusalema, ‘me ba khola lipalema ba qalella ho hooa le ho lla le ho etsa joalo. Ba bang ba Bafarisi bao ba hoammeng ba itse, “Ba khutsitse. Khele, ba re nyarosa. Oh, kamoo batho bao ba hoeletsang ba bile ba its’oere kateng!”

¹⁵⁴ A re, “Ha ba ka khutsa, majoe a tla hoeletsa hang-hang.” Ntho e ‘ngoe e tlamehile ho tsoa. Ha Bophelo bo kena hara lefu, tsoho e teng; ho tlamehile joalo.

¹⁵⁵ ’Me mohla Bophelo bo ho Jesu Kreste bo fihlang lebitleng moo baratuoa ba rona ba robetseng, ho tla ba le tsoho. Bophelo le lefu li ke ke tsa lula ‘moho esita le joalo ka ha lefifi le leseli li ka khona. Hang feels ha lefifi . . .

¹⁵⁶ Ha lets’ eare le chaba, le hatella lefifi lea le leleka. Mots’ eare o tlamehile ho chaba. Ho sa tsottelehe se etsahalang, ha lefats’ e leo le phikoloha mono, ka pel’ a letsatsi leo, lets’ eare le tlamehile ho chaba. Le lokela joalo.

¹⁵⁷ ’Me ka ho tiea ha Bosafeleng, joalo ka ha Bo phikoloha bo toba nako ea ho tla ha Mora Molimo, ho tla fihla tsoho holima lefats’ e lena. ’Me bohole ba robetseng ho Molimo, Kreste o tla ba hlahisa le Eena tshong ea Hae. Ho tla lokela joalo. Ha ho tsela e ‘ngoe ea ho tsoa ho eona. U lokela ho e fumana. ’Me u ka ba le eona joang e le sieo ka mona?

¹⁵⁸ Hase khale, ha ke ne ke eme Gary, Indiana, moo ba ileng ba mphetisa hara maloalahali a setala a Gary. ’Me ke hloletsoe haholo, ha ke ntse ke shebile. Supritente a ‘nyolla, ‘me a mponts’ a tulo eo eohle. ’Me a re . . . Ke ne ke shebile banna. Eaba ho lla phala e nyenyane, metsotso e mehlano pele ho chaisoaa. Ka bona monna ka mong a hlobola foresekoto ea hae a e beha holima mochini oa hae. ’Me hantle ka thoko, ho potoloha mechine ea hae e sehang, a fiella mochoporong, qhubu ea maqhetsoana a bokeletsoeng linthong tseo a ne a sebetsana le tsona. ’Me a li fiella ka ntle mochoporong. ’Me a re, “Ke tla u bonts’ a ntho mona, Mor. Branham.”

Ka re, “Ho lokile.”

¹⁵⁹ Eaba, o kenella morao tulonyaneng. Hoba ho letsoe phala e kholo, banna bohole ba tsoa. Motho e mong le e mong a

hlekehile mohahong; ra sala re eme re le bang. 'Me a tobetsa konopo. 'Me morao-rao koana, ka utloa ntho e thoathoaretsa, e luma, le "burr," e theohang. Ka ipotsa, "Ke'ng hoo?"

¹⁶⁰ Ka mora nakoana, a re, "Joale u emelle ka thoko." Ka emella thoko.

¹⁶¹ Ka bona tselana e theohang mono. 'Me ha e entse joalo, makenetehali ke oona o theoha mono. 'Me eare ha makenete o feta moleng oo, ka qala ka elelloa maqhetsoana ao a fofa ho o khahlanyetsa, ka tsela eo, maqhetsoana ao a ts'epe. Ka elelloa a mang a sa nyoloha. 'Me ka elelloa likotoana tse ling tsa ts'epe li sa ka tsa nyoloha. 'Me eaba makenete oo o khutlela nekong [cupola—Moft.] le ho qhi-...ho lahlela ntho tsena tsohile nekong, 'me ea qhibilisoa ea boela ea etsoa bocha.

¹⁶² 'Me ka re, "Be, hobaneng li sa raoha kaofela?" Ka re, "Ke sa ntse ke bona maqhetsoana."

¹⁶³ A re, "Mor. Branham, re etsa linthoana tsa alumiamono." A re, "'Me likotoana tseo tsa aluminum ha lia hohelloa makeneteng oo."

Ka re, "Ho rorisoe Morena!" 'Me—'me ka re...

A re, "Bothata ke'ng ka uena?"

¹⁶⁴ Ka re, "Ke ne ke mpa ke nahana." Ka baka leo ka re, "Hoba—hobaneng likotoana tseo tsa ts'epe li sa raohela holimo?"

¹⁶⁵ Ho re, "Ha u lemohile, li gurufetsoe fats'e. Ha li khone ho raoha."

Ka re, "Ho rorisoe Molimo! Alleluia!"

A re, "Bothata ke'ng, Mor. Branham?"

Ka re, "Ke ne ke mpe ke nahana."

A re, "U ts'oanetse joalo."

¹⁶⁶ Ka re, "Moena, kae-kae mots'eo koana, bosaFeleng, alleluia, ho na le makenete o moholo. Mora oa Molimo o tla lokolloa, o mong oa meso ena. O fiela holima lefats'e lena, joalo ka makenete. 'Me moea o mong le o mong o hohetsoeng ho Eena o tla ea kopana le Eena sebakeng, le ho kena tsohong mono, ho phela le Eena, ho nkeloa koana. 'Me mebele ena ea khale eo re phelang ho eona joale, kapa e kang eo re nang le eona joale, e tsofalang, e masoebe, le e kobamang; e tla liheloa nekong ea lerole koana, le ho boela e botjoa, le ho etsoa joale ka 'mele oa Hae ka Sebele o khanyang, tsohong ea ho qetela, mohla A tlang hape."

¹⁶⁷ 'Me ka re, "Be, joale sheba mona, ho na le batho ba bangata ba sa hoheloeng. Ho na le batho ba bangata ba gurufetsoeng fats'e ke maemo, ho re, 'Ha ke khone ho e etsa. Ke mpa ke sitiloe feela ho e etsa. Theko e phahame haholo.'"

¹⁶⁸ Moena, ntle le hore pelo e fetoloe, 'me moea oo o lule koana, o hohetsoe ho Molimo ka Moea o Halalelang, mohla Jesu a khutlang, u tla sala u le mong lefats'eng. Hopolang, tsoho e tla ba teng hoseng ho hong, bakeng sa ba shoetseng ho Kreste feela, Molimo o tla ba hlahisa le Eena.

¹⁶⁹ "A tsamaea hara barutua, A itsebisa," ho re, "ho Itsebisa."

¹⁷⁰ Ke fumana banna, hohle na ha ka bophara, ka nako tse ling ba 'nyatsa ka pholiso ea Khalalelo. Khele, moena ka, nka sitoa joang ho lumela pholiso ea Khalalelo, kanthebo ke eona Tlhaho ea Moea o Halalelang. Mang le mang ea tsoetsoeng ke Moea oa Molimo o tla lokela ho lumela mohlolo, hobane eena ke karolo ea Molimo, ke lesika la Molimo.

¹⁷¹ Ke re, "U ts'oana le ntat'ao." Ho re, "U na le nko e kang..." Mpolelle hore ke na le nko e kang ea ntate; ke na le molomo o kang oa ntate. Hobaneng? Ke ntate oa ka. Ke na le tokelo ea ho ts'oana le eena.

¹⁷² Allelu! Joale he, ha Molimo e le Ntate, ke na le tokelo ea ho lumela linthong tse mohlolo, kahobane ke tsoetsoe ke Moea o mohlolo. Hoo ho nketsa sebopua se mohlolo. Ka hare, ka ntle, ke—ke motho oa letsopa; u motho oa letsopa. Empa ka hare, ha u tsoetsoe ke Moea oa Molimo, u fetoha sebopua se mohlolo ka mono, 'me sebopua seo se mohlolo se lapela le ho nyoreloa Lehae la sona la Leholimo, koana. Ke hantle. Amen. Le e hlokomele.

¹⁷³ Ke bao moo ba ne ba le teng. Ke enoa moo A tsamaeang joale. O tsohile bafung. Thabo e qala e fihla. Mehato ea barurtua e qala eba mahlahahlahha. Ntho e 'ngoe e etsahetse; O tsohile bafung.

¹⁷⁴ Ho joalo le ka monna e mong le e mong kapa mosali, ha a tsoetsoe ke Moea oa Molimo, 'me a bona tsoho ea 'nete. Ha ho motho ea tsebang hore Jesu o tsohile bafung, a sa ka a shoa, ka boeena, ka ho Kreste Jesu, le ho tsoaloa labobel, bocha ke Moea o Halalelang. Motho mang le mang o mpa a lumela ka thutabomolimo feela, o lumela ka lintho tse bonoang feela, o mpa a shebile pampiring feela, pele Moea o Halalelang o paka tsoho ea Jesu Kreste. Uena, ho tsoa linthong tse shoeleng tsa bophelo, ho ea ts'epong e ncha le e phelang ka ho Kreste Jesu. Monna e mong le e mong kapa mosali ea se nang hoo o lahlehile, hoseng hona. Ke hantle.

¹⁷⁵ Oh, moena' ka, khaitseli, loka ho Molimo. Hloekisa pelo eo, hoo mangene-ngene a thabo ea Leholimo a tilinyang, 'me tsoho e le teng; Jesu o a phela o bile o busa ka hara pelo.

¹⁷⁶ Elellong ha ba qalella ho tloha ba tsamaea tseleng. Ke nahana e ne e le ntho e babatsehang haholo mono. 'Me Bibele e itse ba ile ba tsamaea, tseleng, ba ntse ba buisana. 'Me ha ba fihla qetellong, feela moo ba ne ba tla lula bosiu bohle, ba sa batle ha A tsamaea.

¹⁷⁷ Ho na le ntho ka Eena, ha u ka tsebana le Eena, ha u batle ha A ka tsamaea. Ke hantle. Joale A . . .

Ba re, "Kena u lule le rona."

¹⁷⁸ Ke rata hoo, "Kena 'me u lule." Motho mang le mang ea kileng a teana le Jesu Kreste o batla A lule. "Lula le rona." Lefats'e le shoеле. Kreste o tsohile. Ke Enoa, o phela le rona. Ke hantle.

¹⁷⁹ "Kena u lule le rona. Ho atametse . . ." 'Me, Jesu, joale hopolang, ba Mo memela ka hare.

¹⁸⁰ 'Me motho mang le mang ea kileng a tla ho Kreste o tla lokela ho memela Kreste tlung e nyenyane eo u lulang ho eona. O tla ka ho mengoa feela. Ha A its'nyake ho uena. U re, "Ha ke batle lintho tseo tsa bokhelohi," ho lokile, u se ts'oenyeha, e ke ke ea ba teng. Empa ha u rata 'me u itokisitse, 'me u itokiselitse ho rekisa ka lintho tsa lefats'e!

¹⁸¹ Joale ka puo ea maobane bosiu ho baromuo. Ke itse, "Ee, le ea sekolong mona 'me le ithuta thutabomolimo ea lona, le ho tsoela ntle mona, ho bala, ho ngola, le lipalo; le ho ea Afrika ho etsa ngoana lihele, habeli, ka motala eo, ho feta kamoo le entseng pele."

¹⁸² Empa ka re, "Jesu, mohla A na a roma barutuo ba Hae ho ba baromuo," O itse, 'Bonang, Ke le romella pallo ea Ntate, le mpe le lule motseng oa Jerusalema pele,' e seng seminareng e itseng, e seng sekolong se itseng sa boits'oaro. O itse, 'Lulang motseng oa Jerusalema le be le apesoe ka Matla a tsoang Holimo. Bonang, Ke le romella pallo ea Ntate, le mpe le lule motseng oa Jesrusalema le be le apesoe ka Matla a tsoang Holimo. Ka mora hona Moea o Halalelang o theohele holima lona, ke hona le tla ba baromuo, kapa lipaki, tsa Ka Jerusalema, Judea, Samaria, le ho isa lipheletsong tsa lefats'e."

¹⁸³ 'Me pele monna a hlomela ka Moea o Halalelang; e seng ka thuto, e seng ka thutabomolimo, e seng ka botho ba kereke. Amen! [Sekheo lebateng—Mong]. . . etela Jerusalema le ho tlatsoa ka kolobetso ea Moea o Halalelang, ha a na tokelo ea sefala, ke hantle; joalo ka moromuo kapa ntho e 'ngoe e sele.

¹⁸⁴ 'Me eitse ha Filippi a theohela mono, moromuo oa pele ea kileng a tsoa, a theohela Samaria. 'Me eitse ha a fihla tlase mono, a bolela Evangelia, a folisa bakuli, le ho tutubolla mahlo a lifofu, a kabolla litsebe tsa litholo. Thabo e kholo ea ba teng motseng.

¹⁸⁵ 'Me hohle moo moromuo oa 'nete oa Molimo, kapa moreri a eang teng, mangene-nyene a thabo a tilinya, a tsoho ea Kreste. U ke ke ua boloka lefu le Bophelo 'moho; li tla arohana. Amen. Joale ha Kreste a kena pelong ea motho, O u arohanya le lintho tse shoeleng tsa lefats'e, ho fetela ts'epong e phelang,

'mopua e mocha ho Kreste Jesu, 'me e ba monna e mocha. Ke a le bolella, baena ba ka, ha eba lefats'e le hloka ntho kajeno, ke tsoho ea 'nete, ea makhonthe, ea Kreste e rereloang bona.

¹⁸⁶ Ba re, "Kena u lule le rona. Shoalane, letsatsi le phirima. Be, re utloile basali bao, seo ba se buileng, rea ipotsa ke 'nete e tletseng na?" Ho tsamaea, ba batla ba nahanne ka ntho e 'ngoe. Empa a re, "Kheloha joale, nakoana feela." Ba re, "Kena u lule le rona." A etsa eka hoja O tla tsoela pele. Hangata O etsa joalo, ho bona feela seo u tla se etsa. Ke hantle. Ka baka leo, ka mora nakoana, ba Mo qophella. Ba re, "Kena ka hare."

¹⁸⁷ Ba kena ka hare, mohlomong ba tlisa lenane la lijo, ho re, "Joale U tla jang bakeng sa tinare?"

¹⁸⁸ 'Me ba qalella, ho re, "Lula le rona. Re a U rata. Khele, re batla U be molisa oa rona. Ho na le ntho e fapaneng le batho ba bang ho Uena. Ho na le ntho e 'ngoe ka Uena; U hhalosa Mangolo ka mokhoa o fapaneng le oa batho ba bang. Re batla feela ha U ka-ka tsamaea le rona. Re batla U kopane le motsoalle oa rona Petrose, Jemese, le Johanne, le bao. Re na le metsoalle e neng e le balateli ba Jesu, 'me re rata ha U ka kena. U bonahala U tseba haholo ka Eena." Athe e ne e le Eena, ka Sebele. E ne e le Eena. U 'nile a lula pela hao hangata.

¹⁸⁹ Ke enoa O ne a eme mono, 'me A qalella ho buisana le bona. 'Me ka baka leo, ntho ea pele lea tseba, eitse ha A nka bohobe...A nka bohobe. Joale, mahlo a bona a ne a foufalitsoe. Eaba O ngoatha bohobe. Eitse ha A phahamisa mahlo a Hae, le ho bo hlohonolofatsa le ho bo ngoatha, le mahlo a bona a buleha. Ke rata hoo. Mahlo a bona a buleha. Ha ho kile ha fihla nako eo kereke ea Kreste e hlokang ho buloa mahlo, ke kajeno; ho ngoathoa ho hong ha bohobe. Mahlo a bona a buleha 'me ba elelloa hore e ne e le Eena.

¹⁹⁰ Oh, metsoalle, na O kile a u bula mahlo joalo? Na O kile a u hlohonolofatsa joalo? Na O kile a u pshatla ho u arohanya le lintho tsa lefats'e, ho u arohanya, nako ea ho pshatla le ho bula. Ke seo kereke e se hlokang kajeno, ke nako ea ho pshatla le ho bula. Eaba mahlo a hae a buleha; ke batla ho re, mahlo a bona a buleha, 'me ba Mo elelloa. Feel a ka mokhoa oo A sebelitseng bohobe boo, ke ka moo ba Mo eleletsoeng kateng. Khele, ke hakae...

¹⁹¹ Hase khale haholo mona, ho ena le mofumahali e mong tlase mona koung. A ts'oeroe ke T.B. Ke khloa a lutse ka kerekeng hoseng hona. Ha ke hopole lebitso la mofumahali eo. O lula ka 'nqane ho...Reese. Kea leboha, khaitseli. Ke hantle. Mof. Reese, o na a robetse mono, a na le bana ba bararo kapa ba bane, 'me ka theoha ho ea mo rapella. A khutlisitsoe sanitariamong holimo mona, ho shoa. 'Me ka baka leo ka theoha ho ea mo rapella.

¹⁹² 'Me ho ena le mosalumele e le moahisane oa ka, 'me a sebeletsa 'muso, Mongh. Andrews. Ka hoo ke ne ke feta kou, ke palame baesekele ea ka. 'Me—'me ke rapeletse mosali, bosiu, masiu a 'maloa pele ho moo. Ka ea hae. Eare ke sa lutse mathuleng, Morena a mponts'a pono ea hore mosali o tla phela.

¹⁹³ Ka hoo, ka theoha. Ka re, "Ke na le HO RIALO MORENA, ho uena. U tla phela."

'Me a re, "Oh, ho bokoe Molimo," mothoana oa batho.

¹⁹⁴ Ka re, "Na u ka ema 'me ua kolobetsoa ka Lebitso la Morena, ho bitsa ho Eena, le ho hlatsua sebe sa hao?"

¹⁹⁵ A re, "Ke tla etsa sohle seo Molimo a ntaelang ho se etsa. Tloo feela u nkeletse, le ho mpolella, 'me ke tla—ke tla e etsa."

Ka re, "Ke hantle."

¹⁹⁶ Meso e 'meli ka mora moo, ka kopana le—le monna a theoha ka seterata mono, 'me e le Mongh. Andrews. A re, "Hela, ema hanyenyane mono, moreri." E ka ba nako ena hoseng, kea kholoa. 'Me a re, "Ema moo motsotso, moreri." A re, "U ea—u ea kae?"

Ka re, "Holimo korosareng."

Ho re, "Ha u its'oabele?"

Ka re, "Eng?"

¹⁹⁷ Ha thoe, "Ho bolella 'me eo e monyenyane, ea shoang, oa batho mono, hore o tla phela."

Ka re, "Che, o tla phela."

A re, "U tseba joang hore o tla phela?"

Ka re, "Jesu o boletse joalo. Ka ke baka leo ke tsebang."

Ho re, "U tseba joang?"

¹⁹⁸ Ka re, "O mponts'itse pono ea hae." Ka mokhoa oo A e sebelitseng kateng; ke tsebile ho tla ba joalo. Ke hantle.

¹⁹⁹ A re, "Nka be ke its'oabela." Ho re, "U tsamaea u thetsa batho joalo feela." Ho re, "U loketse ho its'oabela. Joale, kea tseba ho batla ho le boima ho le thata ho 'na, khetlo la pele, ke kopana le uena ke be ke se ke bua le uena joalo."

²⁰⁰ Ka re, "Ho itoketse. U na le menahano ea hao, le 'na, ke na le ea ka." Ka qhomela baesekele ea ka 'me ka palama ka nyoloha.

²⁰¹ Matsatsi a mabeli ka morao ho moo, mosali oa hae, e leng mosali oa Mokreste, a kula. Ka ea, ka re, "Mong. Andrews, na nka u etsetsa letho?"

²⁰² A re, "Joale sheba mona." Ho re, "Re na le ngaka e khabane." Ho re, "Ha re hloke thuso ea hao ka letho."

²⁰³ 'Me ka re, "Kea leboha." Ka re, "Kea tseba le na le ngaka e khabane." 'Me a bitsa lebitso la eona; 'me ke—ke ngaka e khabane ea motse mona, motsoalle oa ka. Ka re, "Ke ngaka e khabane."

²⁰⁴ A rialo, “Lelana la hae le ruruhile. Re tla lokela ho le nts'a, ‘me ke phetho.” Ho re, “Ha re hloke thapelo mona.”

²⁰⁵ Ka re, “Mono, Mongh. Andrews, ke ne ke sa kope hoo.” Ka re, “Ke ne ke mpa ke batla ho u bolella hore nka—nka u rathela patsi. Nka u etsetsa letho feela leo nka le khonang, ho u roallela chachane, mashala, ntho efe feela eo nka e etsang.”

²⁰⁶ Ka baka leo, oh, a le bohale ruri ka eona. A sa batle, le letho le amanang le thapelo. Ka re, “Ho lokile.” Ka baka leo ka khutlela hae.

‘Me ha ke etsa joalo, khele, ba mo nts'a ba mo isa kokelong.

²⁰⁷ ‘Me hoseng ho hlahlamang, ka qalella ho hlahloba. Ke ne ke—ke ne le lepolesa la tlhaho, le a tseba. Eaba ke tlama sethunya sa ka sa khale, ‘me ka nyoloha ka tsela. Ke ne ke tsamaea, ke nyoloha ka tsela, ‘me ke nyoloha mono.

²⁰⁸ ‘Me ntho ea pele le a tseba, mono, Ntho ea re ho ’na, ho re, “Sokoloha u khutlele morao.” Ke Jesu ea tsohileng, “Sokoloha u khutlele morao.”

Ka nahana, “Oh, che, mohlomong ke utloile . . .”

Ntho ea re, “Khutlela morao.”

²⁰⁹ Ka sokoloha hantle ka khutlela morao. Ka letsetsa Public Service Company. Ke ne ke hlahloba mehala e holimo, hape, ka baka leo ka lets'a, ka ba bolella hore ha ke n'o sebetsa tsatsing leo. Pula e batla efafatsa, leha e ne e se kaalo ho nthibela ho sebetsa, empa ka khutla. Ke sa tsebe hobaneng.

²¹⁰ Ka lula fats'e ka qalella ho qhaqholla sethunya sa ka, ke eme mono ke se bents'a. Ka . . . Meda a re ho ’na, mosali oa ka, a re, “U etsang ha u khutlile?”

²¹¹ Ka re, “Ha ke tsebe. O mpoleletse ho khutla. ‘Kutlo e molemo ho ena le sehlabelo, ho utloa ho ena le mafura a lipheleu.’ Khutla feela.” Ka lula fats'e mono ‘me ke ntse ke bents'a sethunya se se nyenyane sa khale.

²¹² ‘Me ntho ea pele lea tseba, ka lemoha, ho potela ka ntlo; ‘me ke enoa a e tla, katiba ea hae e beiloe ka lekeke, le a tseba, ‘me mamina a lepeletse nkong ea hae, ‘me a kena. A re . . . [Moena Branham o kokota hararo sefaleng—Mong.] A re, “Mof. Branham?”

Ho re, “Ee.”

“Na moreri o teng mona?”

Ho re, “Ee.” Ho re, “Kena, Mongh. Andrews.”

Ho re, “Lumela, moreri.”

‘Me ka re, “Lumela hoseng hona, Mongh. Andrews. U ka lula fats'e.”

²¹³ A re, [Moena Branham o a hloephetsa—Mong.] “U—u utloetse ka Mof. Andrews?”

Ka re, “Che.”

Ho re, “Che,” hore, “o tlil’o shoa, moreri.”

²¹⁴ Ka re, “Oh, ho hobe ruri.” Ka re, “Ke bohloko ho utloa taba eo.” Ho re, “Leha, ke a tseba le na le ngaka e khabane.”

’Me a re, “Ee,” a re, “empa e—e—e ne e se lelana le ruruhi leng.”

’Me ka re, “E ne e se lona? Che?”

²¹⁵ Ho re, “Che. Re na le sepeshelise mono hona joale, ho tsoa Louisville.” Ho re, “Ke lehloele la mali. Le saletsoe ke lihora tse ’maloa ho tloha pelong ea hae,” ho re, “le nyolohela pelong ea hae.” Ho re, “O tlil’o shoa.”

²¹⁶ Ka re, “Banna, ho hobe ruri. Ke bohloko ho utloa hoo.” Ka ’na ka bents’ā sethunya sa ka.

²¹⁷ A re, “Che,” a re, “che, eh, u a, eh, o mobe haholo.”

²¹⁸ ’Me ka re, “E, monghali.” Ka re, “Hoo ho . . .” Mo tlohele a fufuleloe nakoana, ka hona ka ’na ka sebetsana le sethunya sa ka.

²¹⁹ A re, “Che, eh, eh,” a re, “u hopola hore u ka mo thusa?”

²²⁰ Ka re, “’Na?” ka re, “Ha ke ngaka. Ha ke tsebe nka etsang, monghali.” Ka re, “Ha ke ngaka.”

²²¹ A re, “Che, eh, eh, u a tseba,” ho re, “eh, ke—ke—ke ne ke hopotse hore mohlomong—mohlomong u ka, eh, u ka mo thusa hanyenyane.”

Ka re, “U bolela’ng?”

²²² A re, “Che, eh, u a tseba, joalo ka mosali tlase mane ka . . .”

²²³ Ka re, “Ke a bona.” Ka re, “E ne e se ’na. E ne e le Morena Jesu.”

Eaba o re, “Che . . .”

Ka re, “Ke itse ha u lumele ho Eena?”

²²⁴ A mphethela palenyanā ka nako e ’ngoe. E—e Nkhon’ae, kapa e—e rakhali’ae, kea kholoa, o ne a ts’episitse, hore o tla lefa moreri oa khale ea potolohang didolara tse hlano ha selemo se fela. A ile a hlatsoa liaparo, ’me a se na chelete ea ho mo lefa. Eaba letsatsi la ho hlatsoa le a fihla, ’me moreri a tla fihla mono, ’me a se na chelete. ’Me a ena le dime, kapa nikele, kapa e leng hore setene se seholo sa sesepa se ne se ja bokae, eaba o mo roma levenkeleng. A kgutla, ’me a re, o ile a nka e—e setene sa sesepa, ’me ha . . . ’me a ntse a lla. Ho re . . . O ile a isa letsoho la hae a ts’oara foresekoto sa hae se seholo ’me a phumula likeleli tsa hae.

²²⁵ ’Me o ne a okametse ketlele, e kang eo bomm’ā lona ba ne ba ena le eona. ’Me, ehlile, joale u tobetsa talama feela. Hoo ho felile, le a bona.

²²⁶ Empa a beha sesepa holima lepolanka le hlatsoetsang *tjena*. 'Me eare ha a se beha; a utloa ntho e hohlang. 'Me ha etsahala hore a shebe fats'e, 'me a sheba, keha ho hlahile seteneng sa sesepa, 'me ho ena le sekotoana sa gauta sa didolara tse hlano; o ne a ts'episitse moreri oa khale ea potolohang. A re...

Ka re, "E fihlile joang mono?"

Ho re, "Che, ke mpa ke ipotsa?"

²²⁷ Ka re, "Hoo ho entsoe ke Jesu ea tsohileng. 'Me o ne a entse ts'episo ka pelo e lokileng. A hopotsa hore o tla khona, eaba Molimo o mo etsetsa tsela." Hantle ka mokhoa oo A etsang lintho, ke oona mokhoa oo u Mo elloang ka oona. Ka seo A se etsang feela, lintho tseo A li etsang, mokhoa oo A e etsang ka oona. A re...

²²⁸ A re, "Che, ke—ke ipotsitse, kamehla." Ho re, "E sa le e lutse pelong ea ka, ho ipotsa hore ebe ho ne ho na le..."

Ka re, "Hore ho fela ho ena le?" Ka re, "Ho teng, Mongh. Andrews."

²²⁹ A re, "Che, Moena Branham, na u nahana a...A—A—A ka thusa mosali oa ka?"

Ka re, "Ehlile. Kea tseba A ka khona." Ka re, "Na u ka..."

A re, "Na u tla mo rapella?"

²³⁰ Ka re, "Che. Uena u mo rapelle." Ka re, "Ke uena motho ea lokelang ho rapela."

A re, "Che, ha ke tsebe ho etsa thapelo."

²³¹ Ka re, "Ho etsa thapelo ha hao, ho n'u sa tl'o thusa letho, le hona." Ka re, "Khumama fats'e 'me u bue le Eena."

A re, "Che, ke e etsa joang?"

²³² Ka re, "Chechisa setulo sa hao feela, 'me u lule mono feela...khumama ho sona mono feela, pela tafole, 'me u rapele."

²³³ Ka baka leo a khumama fats'e mono, 'me a qala a rapela. 'Me a re, "Joale," a re, "Monghali, ha ke tsebe ho bua le Uena." A re, "Empa ha U ka thusa mosali oa ka!"

²³⁴ A ema a re, "Hela, moreri, joale ha re ee kokelong 'me re bue le Eena." Ho re, "Mohlomong, ha re ka theohela moo e leng ka hara kokelo."

Ka re, "Ho lokile." Mosali oa ka a itokissa. Ra ea mono.

²³⁵ 'Me Mof. Andrews mono, u ke ke ua bona mahlo a hae ho hang, e—e mali a arohane, lea tseba. Lehloele le entse mali... metsi. 'Me u ke ke ua bona mahlo a hae. Ka mo sheba. Oh, banna! Mosali oa ka a qalella ho lla.

²³⁶ Ka khumama fats'e ka qalella ho rapela. Ka re, "Molimo o ratehang, ke U rapela joale ho thusa mosali." Ka re, "Ho a

bonahala bohole ha re na ts'epo 'me ha re na thuso. Ngaka e entse sohole seo e ka se etsang, 'me leha ho le joalo mosali o robetse o a shoa." Ka re, "Oho Molimo, re ne re ka etsa'ng? Re ka etsa joang joale? Re bitsa ho Uena. Re a tseba U tsohile bafung, 'me U phela hara rona. 'Me U ts'oareha joale ka leseli le matsohong a ka. U teng mona. 'Me U na le matla oohle, 'me U ka etsa sena. Joale, Morena, ha re hauhetsoe mahlong a Hao, ka boikokobetso re tla re kopela mosali mohau."

²³⁷ Eare ha ke rapela, lintho tsa qala tsa sisinyeha ka tsela eo. Ka sheba 'me ka 'mona a tla ha ka, a ts'oere phae ea apole letsohong la hae, 'me a mpha eona. 'Me ka lula mathuleng a kapele ka qalella ho ebola phae ena ea apole, le ho e ja. Ka ema he, ha A se a mponts'itse pono.

²³⁸ E ne e le eng? Morena ea tsohileng. Hoo ho entsoe joang? O hara batho. "Lintho tseo Ke li etsang..." A bolella mosali libe tsa hae, selibeng. A bolela moo Filipi a ne a le teng, mohla a leng tlasa sefate sa feiga, a rapela. A tseba moo hlapi, e nang le chelete molomong oa eona e leng teng. O itse, "Ntate o Mponts'a mesebetsi, 'me le 'Na ke sebetsa joalo. 'Me lintho tseo Ke li etsang le lona le tla li etsa." Ke eng? Ke tsoho. O tsohile bafung. Ha A shoa. O na le rona mona joale. O tiile hakaalo, ka phaposing, hantle joalo ka ha leseli le le teng. O tiile hakaalo ruri.

²³⁹ Khele, motho, lilemong tse 'maloa tse fetileng, o na a sa tsebe seo motlakase o no o le sona, empa a ena le tlala ea ho fumana seo o leng sona pelong ea hae. A lumela hore o tla bonesa ka oona. Thomas Edison, 'me a leka lithapo tse likete tse leshome, empa leha ho le joalo a fumana ntho e 'ngoe. 'Me a hlahisetsa lefats'e motlakase.

²⁴⁰ Motho o ne a lumela thelebishene, le—le linthong tsena tsohle. Molimo a e beile eohle mono.

²⁴¹ 'Me Matla a Kreste ea tsohileng a teng hoseng hona, hantle ka hara mohaho ona, ho pholosa moetsalibe ka mong, ho tlatsa ka Moea o Halalelang, le ho folisa boloetse ka bong bo teng lefats'eng, ha feela u tseba mohala o nepahetseng o fihiang ho oona. Ke lerato le tumelo; ke oona mohala o nepahetseng. Kena ka hare 'me u tsamaee hang, 'me u shebe ha A ke ke a bua.

²⁴² Le a tseba, mohla Franklin a na a ts'oara lehalima, a sa tsebe seo a se fumaneng. A re, "Ke le fumane. Ke le fumane. Ke le fumane. Ke le fumane." A tseba hore ho bile le tsoho. [Moena Branham o kokota sefaleng ha ts'eleta—Mong.] Ha ba le ntho eo a e fumanang; a sa tsebe hore e ne e le eng.

²⁴³ Mohlomong Moea o Halalelang o bua le uena ka linako tse ling, u ke ke ua tseba hantle seo O leng sona; empa u a tseba O teng, hantle ka mokhoa oo A sebetsang kateng. Ka mokhoa oo Molimo a etsang lintho; ba E eellooa.

²⁴⁴ Mongh. Andrews enoa, he, eitse ha ke tsoa ho 'molella. 'Me ka tsatsi la boraro, mohlomong a mabeli... Che, lihora tse ka bang peli ho tloha moo, ra khutlela lapeng. 'Me a tla . . .

²⁴⁵ Mohlang oo, e le batho ba tloaelehileng mona. A tla a tsamaea mono. Ba ile ba 'mitsa, ho re, "Mosali oa hao o a sho." Ho re, "Lefu le etsa marata 'metsong oa hae. U mpe u tle."

²⁴⁶ 'Me ke enoa a khutla, a soabile ruri. Ho re, "Moena Branham," ho re, "ngaka e mo tlalehile a tla sho." Ho re, "O teng mono hona joale. O itse, 'O tla sho.'"

Ka re, "Empa Morena Jesu o itse, 'O tla phela.'"

Ho re, "Che, ho ka tla joang . . . Ha a ka sho, na a ka phela?"

Ka re, "O se a ntse a phela."

²⁴⁷ Allelu! Le se ts'osoe ke *allelua*. E bolela "ho bokoe Molimo oa rona." Ha ho kile ha ba le hoseng hoo liallelu li lokelang ho tsoa bathong, ke hoseng hona. Ke hantle. Ho bokoe Molimo oa rona, hoba seriti sohle sa lefu se tlositsoe. O a phela.

²⁴⁸ Elelooang. 'Me a re, "Che, joale," ho re, "o tla khona joang?"

²⁴⁹ Ka re, "Ke . . . Ha se 'na ea tlamehang ho nahana. Sa ka ke ho lumela seo Molimo o itseng O tla se etsa."

²⁵⁰ Ka baka leo a hlonyme haholo. 'Me ka mora nakoana a tsoa a ea kokelong.

²⁵¹ Ke enoa a khutla, 'me a tla a potela ka ntlo, titi, titi, titi. A kena a matha, ho re, "Moreri, na u tseba se etsahetseng?"

²⁵² 'Me ka re, "Ke eng, Mongh. Andrews?" Ke sa ntse ke lutse mono, ke bents'a, le a tseba.

A re, "U tseba se etsahetseng?"

'Me ka re, "Ho etsahetse'ng, Mongh. Andrews?"

²⁵³ Ho re, "O tsohile. Metsi 'ohle a tsoile ho eena. A re, 'Ke lapile ho sho.' " Ho re, "Ba tloha ba mo tlisetsa sopho e sesane. A re, 'Ha ke batle sopho e sesane. Ke batla lisoseje le khabeshe e khabetsoeng.'" O ne a lapile.

²⁵⁴ E ne e le eng? E ne e le eng? Hobane O tsohile bafung. [Moena Branham o kokota sefaleng ha hlano—Mong.] Mosali eo a tsoa kokelong e le mosali ea phetseng.

O a phela, O a phela, ho aba pholoho!

U re ke tseba joang, U a phela? U phela
pelong ea ka.

²⁵⁵ Ke hantle. A fihla mono. 'Me matsatsi a mararo hamorao, ka hata ka maoto a ka mathuleng a ka pele, ho ja phae e monate-nate, mohlomong, nkileng ka e ja. Hobaneng? O a phela. O tsohile bafung.

²⁵⁶ Mosali e monyenyane enoa mona, ha a ne a tsoha lefubeng leo, 'me kokelo e re o tla shoa. O ile a tla koano, eaba o a hana. A hopola e le bokhelohi, ho tla kolobetsoa.

²⁵⁷ 'Me eare a sa lutse mono phirimana e 'ngoe, a ts'oeroe ke feberu e bohale, ha hae, a nkutloa ke rera mono, a le ha hae. Ke rera ka kolobetso ea metsi. A ema a tla, 'me a thekesella tseleng ho tla koano kerekeng. 'Me o ne a lutse morao mono hantle. 'Me a re, "Ke ts'oanelo ho kolobetsoa." Khoabi e kholo e tupile lehetleng la hae. Mof. Weber, holingoana mona, a mo latela seaparo, 'me a tla a mo apesa sona. A kena lets'eng, ka feberu, lekholo le 'ne, 'me a kolobetsoa mono ho latela seo a se ts'episitseng Molimo. 'Me kajeno . . . Moo ke lilemong tse ngata tse fetileng. 'Me, kajeno, ke eo, o lutse mona, o a phela, hoseng hona, hobane Molimo o a phela o bile o a busa, 'me O'tsohile bafung.

²⁵⁸ Liveke tse 'maloa tse fetileng, eena le morali oa hae ba ne ba le Louisville. Ba ne ba theoha ka seterata, 'me ho ena le mosali ea futsanehileng, ea lutseng mono oa mokupi. 'Me o ne a kopa. Ho re, "Mofumahali, ak'u nthuse hle. Ke a hloka." A sheba mokotleng oa hae, a na le chelete e lekaneng, lisente tse leshome le metso e mehlano, ke a kholoa e ne e e le tsona, hore ba ka ts'ela borogo.

²⁵⁹ A 'na a tsamaea. A qalella ho tloha a theoha ka seterata. Morena a re ho eena, ho re, "Joale, mohla u n'u hloka, Ka na ka u thusa. 'Me mosali eo o hloka thuso, 'me ha u batle ho mo thusa."

²⁶⁰ A tsoele pele ho se hokae, ho re, "Morena, empa ke na le lisentse tse leshome le metso e mehlano feela. 'Na le morali oa ka re tla fihla hae joang? Re tla etsa joang?"

A re, "E ka ba eng ho uena? Uena latela 'Na."

²⁶¹ A retoloha, a khutla. A re, "Mofumahali, u nts'oarele." Ho re, "Ke na le lisente tse leshome le metso e mehlano feela, ke phetho seo ke ne ke se ts'oere, bakeng sa ka le morali ho ts'ela borogo." Ho re, "Ke u fa eona. Ke phetho seo ke se ts'oereng. Ke masoabi ha ke sa ts'oara e fetang moo."

A re, "Morena a u hlohonolofatse, morali oa ka."

²⁶² A reteleha, a qala a tsamaea. Morali oa hae a re, "Joale, 'me, re tla etsa'ng joale?" Ho re, "Sephethephethe sohle, ho tla ba kotsi ho tsamaea borogong boo." Ho re, "Re ke ke ra tsamaea borogong joale."

²⁶³ A re, "Ha ke tsebe. Ke Eena ea ntaetseng ho nehelana ka eona, 'me ke phetho seo ke ne ke ena le sona."

²⁶⁴ Ho theoha le seterata, 'me nakong eona eo a sheba. Morali oa hae a re, "Oh, 'me, sheba! Nikele ke ena moo e robetseng." 'Me le eena a sheba, 'me a re, "'Me mona ho robetse dime."

²⁶⁵ Ke eng? Ka mokhoa oo A etsang lintho feela. O re tsebisa hore O teng mona.

²⁶⁶ Hlabula le tsoa feta lena, ke ne ke tsoile, likopanong. Mosali oa ka a kena, a re, "Billy, ke lokela ho fumana cheke. Ho ea le ho fumana likorosari tse 'maloa."

²⁶⁷ Moreri oa khale oa batho o ile a feta le mona, ho re, "Moena Branham, ha ke na chelete." Ho re, "Ke—ke feletsoe. Ke lokela ho ea Texas." Ho re, "Ke—ke tla u lefa ka tsatsi le leng ha ke khona." Ho re, "Ana u ka nthusa, ho nthusa?" Ho re, "Ke batla didolara tse mashome a mahlano."

²⁶⁸ Ka theohela bankeng, ho sheba hore ke na le eona na. Che, ke ena le feela—feel a didolara tse ka bang lekholo, ka baka leo ka ea 'me ka mo fa didolara tse mashome a mahlano tsa eona. A e nka a ikela.

²⁶⁹ Linthoana tse hlahang, le tseba kamoo ho leng kateng. Mosali a re, "Billy, ke lokela ho fumana cheke hoseng hona, mohlomong didolara tse mashome a mabeli, ke lokela ho ea fumana likorosari." Ra theoha ho ea fumana likorosari. Ho khutla. O ne a lebetse mahe. Re sa a fumane. Ka hona ka nahana, "Oh, banna, che," ho nahana, "mohlomong motho e mong o tla etsa ntho e 'ngoe."

²⁷⁰ Ka hoo ka ea, 'me ke thusa Mongh. May, ke batla ke... Ho eso fihle motho lapeng, 'me ke ntse ke phutha matlakala mono. Ka sheba, 'me ka bona ho kena koloi ea khale, e khanna e ema ka thoko, le ho lula fats'e. 'Me eaba ho tsoa moreri oa khale mono, a batla a holofetse; le ho tla a tsamaea, ho lula mathuleng, a its'etleha. Ka nahana, "Moreri eo oa batho, oa khale ea katlehileng; ke—ke lokela ha ea 'mona."

Ka ea. Ka re, "Lumela hoseng hona."

²⁷¹ A re, "U phela joang, Mor. Branham?" Ho re, "Ha ke kholoe u ntseba." 'Me a mpolella e ne e le mang. Ho re, "Ke e mong oa bareri bana ba futsanehileng." A re, "Ke ne ke le holimo Cleveland, ba mphile mafura a lekaneng, ho fihla mona." Le ho re, "Koloi ea ka ea khale mono e batla e omme." Ho re, "Ntho e mpoleletse ho feta le mona." Ho re, "Mohlomong u ka nthusa ha nyenyane."

²⁷² Ka mo sheba. Ka nahana, "Khele, eh," lea tseba. Ka nahana, "Motho oa batho."

Ka re, "Ha re rapele."

A re, "Ke batla ho rapele uena. Ke na le noka e bohloko."

'Me ka re, "Ho lokile." Ra khumama fats'e ra qalella ho rapela.

²⁷³ Eitse ha ke qalella ho rapela, Morena a re, "Mo fe didolara tse hlano."

²⁷⁴ Ka re, "Che, Morena, ehlide, U tseba tsohle ka eona. Uena, Uena u tseba hore e teng, kapa che."

'Me ka re, "Morena o re ke u fe didolara tse hlano."

Ho re, “E ngata haholo, Moena Branham.”

²⁷⁵ Ka re, “Empa O mpoleletse ho u fa didolara tse hlano.” Eaba ke ngola cheke. Ka re, “E ise ha Strother, ba tla e lefa.” Ka nahana, “Joale ke eng?” Ho tsoa. A khanna a tsamaea, ‘me a tsamaea nakoaneng.

²⁷⁶ Ho ena le monna ea sebetsang tlung mono, a tla le Monghi Luther. A re, “Be, moreri!”

’Me ka re, “E.”

²⁷⁷ Ho re, “U a tseba,” ho re, “Ke na le lithole tse lekholo lapeng.” Le ho re, “Lithole tseo tsa khale,” ho re, “ke—ke li fepile lijo tsohle tsa pele le ntho tsohle, le lijo, ‘me,” a re, “ha ke khone hore li behele.” A re, “E ka ba veke e fetileng, ha ke ne ke khumama, ke re, ‘Morena, ha U ka—ha U behelisa lithole tsena, ke tla nehelana ka halofo ea mahe.’” Ho re, “U a tseba, tsa qala tsa behela.” Ho re, “Tsatsi le hlahlamang ka fumana mahe a mashome a robong.” A re, “Ke—ke na le lekase mona, ke batla ho u fa oona.” Didolara tse hlano, hantle feelsa.

²⁷⁸ Ke eng? Ka mokhoa oo A etsang lintho hantle. Ke leka ho reng hoseng hona? Ke leka ho bolela sena, ho re, Jesu Kreste oa phela o bile oa busa. O tsohile bafung. A ngoatha bohobe. Mahlo a bona a buleha. Ba eleloa hore e ne e le Eena, hantle kamoo A entseng ntho e ’ngoe le e ’ngoe. Le lebelle feelsa ‘me le tla fumana, ka mokhoa oo A etsang lintho, O sa phela le ho busa.

O a phela, O a phela, ho aba pholoho!
U re ke tseba joang O phela? O phela
pelong ea ka.

²⁷⁹ Molaetsa oa Hae e le, “E-eang le bolelle barutua ba Ka Ke tla kopana le bona Galelea.”

²⁸⁰ ’Me molaetsa oa Hae, kajeno, ke hore O tla kopana le lona. “Ke tla kopana le lona,” hohle moo le kopanang le Eena teng. “Tloong ho ’Na, lona bohle ba khathetseng le ba imetsoeng.”

²⁸¹ Empa, metsoalle ea ka, joale ka ha batho bao ba ile ba makala, ha ba utloa Monna enoa ea lebopong, a re, “Lahlelang letlooa la lona.” Ba ne ba sa e tsebe. Le banna bana ba Emmause, mohla ba ne ba tsamaea le ho buisana le Eena, ‘me ba sa e tsebe.

²⁸² Le bongata ba rona, metsoalle ea ka, bo fositse pheo ea pitso e holimo ka ho Kreste, kahobane re sa lemoha. Hangata, Setulong sa Kahlolo, ho tla ba le masoabi, ha u lemoha hore borapeli boo ba Jesu Kreste, bo tlisa pholoso le thabo le nyakallo. E leng bo reiloeng, joaloka ha Pauluse oa khale a boletse, “Ka mokhoa o bitsoang bothotho.” Bothoto ke “bohlanya,” le a tseba. “Ka mokhoa o bitsoang bothotho, ke kamoo ke rapelang Morena Molimo oa bontata rona; ka mokhoa o bitsoang bothotho.”

²⁸³ Hangata le bona batho ba thabileng le ba nyakaletseng, le ba tletseng Moea oa Molimo, moo pholiso ea Khalalelo le matla le mehlolo le meeka e etsoang. Ba re, "Ke ho reba kelello." Ba re, "Ke sena, sane kapa se *seng*." Empa, ha feels u ka bala Bibele, ke Morena Jesu Kreste. U mpa u sa Mo lemohe. U mpa u sa lemohe hore ke Mang.

²⁸⁴ Kea ts'epa le pele letsatsi lena le feta, pele letsatsi lena le feta, O tla etsa ho hong bophelong ba hao, u tle u Mo lemohe, 'me tsoho e tla chaba pelong ea hao, ha eso ka e etsa joalo. 'Me ha... Mme u tla eleloa linonyana li bina ka mokhoa o fapaneng. Jesu ea ratehang ea tsohileng, hoseng hona, o tsohile bafung, ka baka leo ts'abo tsohle tsa lefu li tlohile. Alleluia! Li koaletsoe hole koana Leoatleng la Tebalo.

²⁸⁵ Mohla mohalaleli Pauluse oa khale a na a fihla pheletsong ea tsela, 'me a lutse mono ka mahlaahlela a tlamileng maoto a hae, le matsoho a hae; ba ne ba haha liboloko ka ntle mane, tseo ba tla pomela hlooho ea hae ho tsona. Eitse ha ba re, "Pauluse, u nahana'ng ka taba ena joale?"

²⁸⁶ A re, "Ke loanne ntoa e molemo, ke qetile sebaka, ke bolokile Tumelo; 'me joale ke beetsoe moqhaka oa ho loka,... Morena, moahloli ea molemo, a tla mpha oona ka Tsatsi leo; e seng 'na ke le mong, empa bohole ba ratang ho hlaha ha Hae."

²⁸⁷ Eare ha ba mo isa kutung mono, a theola kholloro ea molala oa hae, 'me a robatsa hlooho ea hae mono, lefu la mo tjamela sefahlehong hantle. A re, "Joale ke u fumane. Joale u ts'ohile."

A re, "Uena lefu, tsenene ea hao e kae?"

²⁸⁸ Ho sheba ntle mane, 'me a ba bona ba cheka sekoti, ho mo kenya lebitleng. Lebitla la khale le seretse la re, "Ke tla u ts'oara. Ke tla u fetola. Ke tla bolisa 'mele oa hao. Liboko tsa letlalo li tla nyeunya ho uena. Ke..."

A re, "Lebitla, tlholo ea hao e kae?"

²⁸⁹ Empa a shebisa hlooho ea hae 'nga Jerusalema, oho, banna, "Empa ho lebohuoe Molimo Ea re fang tlholo ka Morena oa rona Jesu Kreste!" Oho, banna!

²⁹⁰ Ke ts'oanelo ho fihla pheletsong ea tsela. Le leng la matsatsi ana, mesebetsi ea ka e tla fela. Bang ba lona bashanyana ba lutseng mona, re bapetseng 'moho, ra betsaa litebele 'moho, ho bapala limabole 'moho, le ntho e 'ngoe le e 'ngoe. Re le bashanyana mohlang oo. Empa joale ke qala ke eleloa... Hosane ke tsatsi la ka la tsoalo. Ke tla be ke le lilemo tse mashome a mane le metso e mene, hosane. Mahetla a ka a qala a kobama, le masoebe a hlaha tlasa mahlo a ka, moriri o batlang o setse o a pulufala. Ke eng? Lefu lea kena; lea nthumakanya.

²⁹¹ Empa, moena, ere lefu le sa nthumakanya ka lehlakoreng le leng, Bophelo bo boela bo nchafatsa ka lehlakoreng le leng. Ke hantle. 'Me le leng la matsatsi ana bohole le tla ema holimo mona sets'eng sa mabitla, moo ba seng ba le lokisitse; 'me ha nka shoa pele Jesu a fihla, ba tla bina *Lumela Feela*, "Tsohle li ka etsoa, lumela feela."

²⁹² Mohla le utloang ba re, "o ile," joale le fafatse mobu holima lekese; ha kea tsamaea. Le joale, ke sa phela, kahobane A phela. Che.

²⁹³ Hoseng ho hong mohla sehla se babatsehang sena sa selemo, ha tsohle li fetile; 'me lithuhaki tsa atomo li phatlotse lefats'e ho le isa hole koana, 'me le se le kolokotehile, ka lilemo tseo, 'me le se le hloekisitsoe, ho khutlisoa; le lifate tsa lipalema li tla boela li mela lefats'eng, tsoho ea tlhaho eohle, joale ka ha Molimo o entse ts'imolohong. Ts'ilafalo ea mobu ha e sa tla ba teng. Ha ho sa tla ba le ts'ilafalo moeeng. 'Me lifate tsa lipalema, ha ho sa tla ba le likoanahloko kapa mafu a li katlang hape. Lifate tsa liapole ha li sa tla tsofala. Alleluia! Se tla tsoha. 'Me hoseng ho hong ho hotle, ho phatsimang, mohla linonyana li fofang ho tloha sefateng ho ea sefateng, Jesu o tla boela a hlaha lefats'eng mona. 'Me ha A etsa joalo, "ba shoeleng ho Kreste, Molimo o tla ba hlahaha 'moho le Eena."

²⁹⁴ Re tla tsoha hoseng ha Paseka, hape, ho kopana le baratuoa ba rona le ho ba lumelisa. Ana e ke ke ea ba nako e babatsehang eo? [Phutheho e re, "Amen."—Mong.]

²⁹⁵ 'Me nka ema koana... 'Me ke bona 'me oa ka ea tsofetseng a lutse morao mono mots'eo mohahong, hoseng hona, o nts'a tsofala a eba letooke, le ho omella litho, 'me o qala a tsofala. Mohla ke 'monang mono, le ho re, "'Me, enoa ke moshanyana oa hao." Le ho fihla mono ke bona baratuoa ba ka, le metsoalle ea ka e ratoang kerekeng mona, Moena-nyana oa khale George DeArk, bao bohole ba theohileng ka ho Kreste Jesu. Metsoalle ea ka eohle e ratehang, mohla ba tsosoang, 'me ke khona ho kopana le bona.

²⁹⁶ Le ho atamela mono le ho re, "Thaka leo le tlang mono ke mang?"

²⁹⁷ "Ke Pauluse eo. Silase ke enoa a etla. Daniele ke enoa. Ke mona, Ezekiele ke enoa. Bao bohole ke bana." 'Me re ka khona ho tsamaea hara Paradeise ena ea Molimo.

²⁹⁸ Tsoho ea 'nete e tla ba teng, o mong oa meso ena, motsoalle. Re tla kopana le uena.

²⁹⁹ Lesea leo le shoeleng, le ka bang le *kana*, e tla ba mofumahatsana. 'Me le tla aka 'ma lona, le ho lla mono le ho bokolla, le ho rorisa Molimo ka tsoho ea Hae e khanyang ea Mora Hae, Kreste Jesu. Letsatsi le leng le khanyang, e tla fihla.

³⁰⁰ Re phetse joale kahobane re na le tebeletso ea pholohoa rona, Moea o Halalelang mona, o pakahatsa hobane tsoho e teng. Joang?

³⁰¹ Ka nako e 'ngoe ke ne ke le moetsalibe. Ka nako e 'ngoe nke ke ka ema ka mora sefala sena. Ka nako e 'ngoe u n'u ke ke ua nkutloa ke phahamisa lentsoe la ka ho re "amen"; nka hlajoa ke lihlong. Ha ba le nako moo ke ne ke hloka keleli mahlong a ka; nka hlajoa ke lihlong. Ke le "Bill e moholo ea khopo."

³⁰² Empa, tsatsi le leng, Jesu Kreste a kopana le 'na ka Matla a tsoho ea Hae. A pshatla pelo eo ea lejoe a ba a e nts'a ho 'na. A kenya mohopolo o mocha. A kenya tlhaho e ncha. A kenya Motho e mocha mona. 'Me kajeno, hobane A phela, le 'na ke phela ke hona.

³⁰³ 'Me le leng la matsatsi ana, metsoalle, ha ke fihla pheletsong ea tsela, joalo ka uena le rona bohole, 'me lihlomo tsa rona li bothelitsoe, ntoeng! Oh, banna! Ho sheba thebe ea khale, ho bona bongata ba metsu e tukang eo e ileng ea lokela ho nqhelela eona. Ke fihlile tlase mono 'me ke utloa maqhubbua kena moeeng oa ka, kea tseba ke pheletsong ea tsela he. Joalo ka 'me oa ka mono, le joalo ka boBranham bohole, ha ba tsofala haholo, ba qala ba thothometsoa ke letoope.

³⁰⁴ Ke batla ho ema mono, alellua, ke its'etlehile ka lere, pheletso ea tsela. Ke batla ho rola heleme ea ka, 'me ke e behe lebopong la leoatile; ho khumama lebopong, le ho khutlisetsa Sabole ea khale selateng sa Bosafeleng, le ho phahamisa matsoho a ka le ho hoeletsa. 'Me kea tseba, ha ke tsamaea khohleng ea moriti oa lefu, Naleli ea Meso e tla chaba ho bonesa tsela. Moea o Halalelang o tla otlollela liphuka tsa Hae tse theko e thata mose oane ho Jordane eo e seretse e ts'abehang, le ho jara meeaa rona e khathetseng ho ea lefats'eng le molemo. E, monghali.

³⁰⁵ Le se ke la ts'oha. "Nke ke ka ts'oha bobe leha bo le bong, hobane U na le 'na." "Lefu le metsitsoe ke tlholo." Ho na le... Lefu le ke ke la etsa letho. Mongoli e mong o n'a bue, a re, "Ntho feela eo Molimo a e entseng ka lefu, O le emisitse koloing oa le qhaneha, le ho le bofa lichafong tsa koloi. 'Me ntho feela eo lefu le e etsang ke ho hulela molumeli ka pela Sefahleho sa 'Mopi oa hae." Ke eona feela ntho eo lefu le ka e etsang. Le leng la matsatsi ana, lefu le tla silakanya karolo ena e shoang.

³⁰⁶ Empa joale mohla ke sa le lesea, 'me ha ba le ntho e mohlololo e nkemetseng ho 'me, ho mpha bophelo, mohla ke ne ke tsoaloa. "Ka hona efela ha motlotloana ona o senyeha, ho na le o emeng koana Khanyeng," o lokisitsoeng koana, moo boloatse le mahlomola li leng sieo. 'Me joalo ka ha ke tsoetsoe ke Moea mona, 'me Moea oa Molimo o hoeletsa, "Abba Ntate";

e seng 'na feela, empa motho e mong le e mong lefats'eng, ea tsoetsoeng labobeli, ha—ha 'mele oona oa moea, ha re ntse re hola mohaung oa Morena oa rona Jesu Kreste. Ka tsatsi le leng re tla hata ka nqane ho moeli 'me re tla kena 'meleng o mocha oo, moo moriri o moputsoa o sa tl'o hlola o ba teng, mahetla a kobameng, kapa letho la tse joalo. Re tla ba bacha mono, kamehla, hobane Jesu Kreste o tsohile ka letsatsi la boraro ka mora ea Hae tso...ka mora lefu la Hae, le ho tsoha hape.

³⁰⁷ O a phela. O a busa. Joale, e-eang le boelle barutuo ba Hae. "E-eang le boelle batho ba Hae hore O itse, 'Ke tla kopana le lona Galelea.'" Ka le leng la matsatsi ana, Galelea oa Molimo, kae-kae koana, ke lebeletse ho kopana le Eena ka khotsa, hobane O phela pelong ea ka kajeno. Ke ts'epa A lutse joalo pelong ea e mong le e mong oa lona. 'Me ere re sa . . .

³⁰⁸ Ke masoabi ha ke nkile nako e ngata mona, e ka ba lihora tse 'maloa feela pele ts'ebeletso ea sekolo sa Sontaha e qala. Na re ka inamisa lihloho tsa rona.

³⁰⁹ Oho Molimo ea Lereko, 'Mopi oa Maholimo le oa lefats'e, moqali oa Bophelo bo se nang phello, mofani oa neo e 'ngoe le e'ngoe e molemo, re a U leboha, hoseng hona, ka tsoho ea Jesu Kreste. Lilemo tse ka bang makholo a leshome le metso e robong tse fetileng, hoseng hona, ketsahalo e kholo ena e ile ea etsahala. Pele ho moo batho ba ne ba ts'aba lefu; empa, hoba A fihle, eaba O tlosa ts'abo eohle ea lefu.

³¹⁰ 'Me kajeno O a phela o bile o busa pelong tsa rona. O itse, ka mora tsoho ea Hae bafung, A re, "Ke tla ba le lona, le ka ho lona, ho isa pheletsong ea lefats'e." Ho se ho fetile lilemo tse makholo a leshome le metso e robong le ho hong, ho tloha ketsahalong eo, empa, hoseng hona, O phela ka bocha lipelong tsa rona.

³¹¹ Re bokane mona, hoseng hona, Morena, ho Mo khumamela, ho ruta ka Lentsoe la Hae, ho utloa Moea oa Hae, ho tsukutla letsoho la e mong; le ho re, "Ho rorisoe Molimo," ho e mong le e mong, hobane re lumela A ile a shoa a ba a tsoha.

³¹² Re lumela taba eo ka ho rona, hoseng hona, Morena, ka mohau oa Molimo, Bophelo bo sa shoeng bo busa libopehong tsa rona tsa nama. Re lumela ho ena le Moea oa Molimo o sa shoeng ka hare ka mono, le hobane O ke ke oa shoa le ka mohla. 'Me O se a . . . O itse, "Ke tla ba fa Bophelo bo se nang pheletso. Ba ke ke ba timela, 'me 'Na ke tla ba tsosa tsatsing la morao." Re a e lumela, Morena, hoba re lipaki tsa tsoho ea Hae.

³¹³ Joale, Ntate, re hlohonolofatse letsatsi lohle. Hlohonolofatse baeti ba monyako oa rona. 'Me kajeno e ke e be letsatsi la thabo.

³¹⁴ 'Me ha ho ena le bao mona, hoseng hona, Morena, ba eso tsoaloem labobeli, ba sa tsebeng boiphihlelo ba ho phela le Jesu

Bophelong bo tsohileng, Bophelong bo bocha, moo mahlaahlela a khale le litakatso tsohle tsa lintho tsa lefats'e li nyahhlitsoeng, 'me ba sa tsebe se boleloang ke ho ba 'mopuo a mocha ho Kreste Jesu; oho Moea o Halalelang, tsamaea holima bona, kajeno. Bululela bothong ba bona, Bophelo bo sa shoeng. 'Me mangene-ngene a thabo ea Leholimo a ke a tlolake, Pasekeng ena, litaba tse monate, kajeno, 'me ba ke ba tlohe 'me ba fetohe libopua tse ncha ho Uena.

³¹⁵ Utloa thapelo ea mohlanka oa Hao, Morena, hoba ke kopa lehlohonolo lena ka Lebitso la Jesu Kreste. Amen.

Ho lokile, na re ka ema. Ho lokile, Moena Neville.



E-EANG LE BOELLE BARUTUOA BA KA SST53-0405s
(Go, Tell My Disciples)

Molaetsa wona o tlieng ka Moena William Marrion Branham, o rerilweng tshimolohong ka Senyesemane ka Sontaha ha letsatsi le tjhaba, Mmesa, 5, 1953 mane Tabernakeleng ya Branham mane Jeffersonville, Indiana, U.S.A., o ntshitswe mabanteng a kgatiso a makenete mme o ngotswe o sa kgutsufatswa ka Senyesemane. Phetolelo ena ya Sesotho sa Borwa e phatlaladitswe ka 2006 ke ba ha:

©2006 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org